

DIDZA' DXI'A BUZÚAJĚ' LUCAS

Didza' rigu'ë Lucas lu në'ë Teófilo

1 ¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'luí'i rë'u, en bulu'zë didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inózinu' naca idútë li lë na' chinazëdu'.

Ruluí'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' xzí'ini xi'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bë' xibá queë'. Caní guca, cuntú nu guca bi inné' quégaquië'. ⁷ Cuntú nu zoa bi'i quégaquië', tu' nácanu Elisabet nigula huödx, ate' chinagúlagaquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. ¹⁰ Tsanni ni' ruzégui'ë Zacarías na' yalaj, gula'cuá' yúgu'të bönachi ní'ilö, tu'lidza Dios. ¹¹ La' ná'asö buluí'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj. ¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'. ¹³ Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. ¹⁴ Gata' quiu' le uzi'u xibé, en udzéjanu', ate' zián nupa ulu'dzeja ládxi'gaca cate' gálajbi' bí'ido' na', ¹⁵ tu' gácatëbi' zxön lahuë' Dios. Biti' guí'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. ¹⁶ Gunë' Juan ni ga ulu'huóaca zían bönachi Israel queë' Xanru'. ¹⁷ Inóruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácacaga xuz len xzí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu né'eguequi Xanru'.

¹⁸ Zacarías gunábinë' gubáz lá'ayi na', rnnë':

—¿Bizxi gaca bē' para inözda' ilaca lē ni? Chinagúla' neda', en chinagúlanu ca' nigula quia'.

¹⁹ Bubi'ē didza' gubáz lá'ayi na', rnnē':

—Neda' lea' Gabriel. Runa' dxin lahuē' Dios. Lē cazē' gusól-lē'ē neda' para güí'ilenā' li' didza', en usiyönda' li' didza' dxi'a ni. ²⁰ Na'a, tu' cabí guyéajlē'u xtídza'a, icödzu', en bítirö gaca innó' cate' gácarö lē ni. Yúgu'tē lē ni udxín cate' idxín dza que.

²¹ Tsanni ni' raca lē ni, nacuá' bönachi ní'ilö, ta'böza Zacarías, ate' tu'bani tu' ridzenē' xidzé ga na' zoē' lu lataj lá'ayi. ²² Cate' burúajē' Zacarías, biti' guca güí'ilenē' légaquiē' didza', ate' guléquibe'enē' bilé'enē' tu le buluí'inē' Dios lē' lu lataj lá'ayi. Bulá'a buluí'isē' Zacarías, buzéajni'inē' légaquiē', tu' cabí raca innē'.

²³ Cate' bizá'a yugu' dza na' ral-la' gunē' dxin Zacarías lahuē' Dios, ní'irö böajē' lidxē'. ²⁴ Gudödi yugu' dza na' Elisabet, nigula queē' Zacarías na', biá'anu-bi' lē'ēnu bí'ido', ate' idú gayu' beo' bugá'anasinu ga zoa lídxigaquiē'. Guzá' ládxi'nu, rnnanu: ²⁵ “Caní runē' Xanru' quia'. Ruzá' ládxē'ē quia' bí'ido', en runē' ga bítirö utuí'ida' lógaca bönachi.”

Riguíxjö'ē gubáz lá'ayi ca si' gálajbi' Jesús

²⁶ Cate' chiguca xopa beo', buluí'i lahuē' gubáz lá'ayi na', tu' gusól-lē'ē Dios lē cazē' Gabriel, tsejē' Nazaret, tu yödzö luyú Galilea. ²⁷ Dios gusól-lē'ē lē' ni' tsöjyúē'-bi' tubi' bi'i nigula ra'bando' lēbi' María. Chinazí' lu ná'abi' María utsaga ná'alēbi'-nē' bönni' lē' José. Nababē' José di'a dza queē' David, bönni' gunná bé'enē' bönachi Israel dza ni'te. ²⁸ Cate' guyáziē' Gabriel na' ga zóabi' María, gudxē'-bi':

—Padiux. Dios ruzá' ládxē'ē quiu'. Xanru' Dios zóalenē' li'. Lē cazē' benē' ga nácaru' li' bica' ba ca yúgu'tē nigula.

²⁹ Cate' bilé'ebi' María gubáz lá'ayi na', guró'öbi' böniga tu' nözi didza' na' bē'ē, en rubani ládxi'bi' nacxi sa'yéaj didza' na' bulidzē'-bi' gubáz lá'ayi na'. ³⁰ Ní'irö gubáz lá'ayi na' gudxē'-bi', rnnē':

—María, biti' gádxinu', tu' chibidéli'nu' le ruzá' ládxē'ē Dios quiu'.

³¹ Na'a, tsú'ubi' tubi' bí'ido' lē'u, ate' uzú'-bi' tubi' bi'i bönni'do', ate' gu'u labi' Jesús. ³² Jesús ni tsépisētērē', en si' Lē' Zxí'inē' Dios, Nu nayépisētērö. Xanru' Dios gunē' ga inná bē'ē ca na' gunná bē'ē David, xuz gula gudödi queē'. ³³ Jesús na' inná bé'etica'sinē' bönachi Israel, ate' le inná bē'ē Lē' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lē ni, tu' cabí zóalēna' bönni'?

³⁵ Bubi'ē didza' gubáz lá'ayi na', rē'ē-bi':

—Guidē' Dios Bö' Lá'ayi ga zu', ate' yöl-la' huáca queē' Dios, Nu nayépisētērö, sóalen li', le gaca ca tu zxul-la rigú'u böaj ga zu'. Que lē ni na' bi'i bönni'do' na' ral-la' gálajbi', tsú'ubi' lu nē'ē Dios, ate' si' labi' Zxí'inē' Dios. ³⁶ Cá'anqueze Elisabet, nigula di'a dza quiu', chinuá'anu-

bi' lé'ënu tubi' bi'i bónni'do' sal-la' chinagúlanu. Gula'nné' queénu:
 “Nácanu nigula huödx”, pero chizéaj xopa beo' nuá'anu-bi' lé'ënu bí'ido'
 na'. ³⁷ Biti' bi zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na'
 chigunnó'.

Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca
 guí'ado', en bidxinbi' tu yödzö luyú Judea. ⁴⁰ Ni' guyázabi' lidxë'
 Zacarías, en gúdxibi'-nu Elisabet:

—Padiux.

⁴¹ Cate' biyóninu Elisabet didza' na' bé'ëbi' María, la' butátë cuinbi'
 bi'i hué'ënido' na' yú'ubi' lé'ënu, ate' bidisóalenë'-nu Dios Bö' Lá'ayi.

⁴² Ní'irö bé'ënu Elizabet zidzaj didza', rnnanu:

—iChinunë' Dios ga nácaru' li' bica' ba ca yúgu'të nigula, en chinunë'
 ca' ga nácabi' bica' ba bí'ido' na' yú'ubi' lë'u! ⁴³ ¿Núzxitë neda', zá'anu
 xiné'ë Xana' quia'? ⁴⁴ Cate' biyönda' didza' bë'u, bulidzu' neda', lu yöl-
 la' rudzeja queëbi' la' butátë cuinbi' bi'i hué'ënido' ni yú'ubi' lë'a.

⁴⁵ iBica' ba li' tu' guyéajlë'u xtídzë'ë gubáz lá'ayi, ate' udxín caz lë na'
 gudxë' li' uláz queë' Xanru'!

⁴⁶ Ní'irö gunabi' María:

iIdútë le naca' rigú'u Xanru' yöl-la' ba,

⁴⁷ en rudzeja ládxi'lëna'-në' Dios, Nu rusölá neda'!

⁴⁸ iDios caz buzá' ládxë'ë quia' neda'!

Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

⁴⁹ iZxöntëro naca le benë' Dios unná bë' quia'!

iLá'ayi naca Lë'!

⁵⁰ Lë' ruhuéchi' ládxi'tica'së' bönachi tadxi Lë'
 na'a dza, en dza zá'gaca.

⁵¹ Yugu' yöl-la' huáca zxön chibenë' Lë'.

Buzötjë' nupa gulún zxön yöl-la' réajni'i quéguequi.

⁵² Bugúë' yöl-la' unná bë' quégaca nupa gulaca lo,
 en benë' ga gulaca lo nupa gulaca nöxaj ladxi'.

⁵³ Benë' ga bulu'huólaj bulu'dzé'e nupa gula'dún,
 en bucá'anë' cá'asö nupa bila'lé'e yöl-la' tsahui'.

⁵⁴ Gúcalenë' bönachi Israel, nupa na' tun xichinë',
 tu' yöjnenë' légaquië', en buéchi' ládxë'ë légaquië'.

⁵⁵ Benë' ca guzxí' lu në'ë gunë' quégaquië' xuz xtó'oru'
 enca' queë' Abraham, en quégaca di'a dza queë'.

⁵⁶ María bugá' analenbi'-nu Elisabet idú ca tsonna beo', ate' gudödi ni' bö'ajbi' lédxibi'.

Le guca cate' gúlajbe' Juan, bönni' uquilë' bönachi nisa

⁵⁷ Cate' bidxín dza ral-la' sóabi' bí'ido' queénu Elisabet, buzóanu-bi' tubi' bi'i bönni'do'. ⁵⁸ Bila'yöni dzaga yu'u queénu, en yugu' di'a dza queénu ca na' guca, buéchi' ládxë'ë-nu Dios, ate' bulu'dzéjalen lënu. ⁵⁹ Cate' chiguca xunu' dza zóabi' bí'ido' na', bila'dxinë' di'a dza queénu para ila'chúguië' lu xipéla'bi' bi'i bönni'do' na' lë na' gaca bë' néquibi' queë' Dios, ate' té'ënnë' ilu'ë labi' Zacarías ca na' lë' xúzibi'. ⁶⁰ Ní'irö bubí'ínu didza' Elisabet, xiná'abi', rnnanu:

—Calëga. Juan si' labi'.

⁶¹ Gula'nábinë'-nu, ta'nné':

—¿Bizx que? Cuntu nu di'a dza quiu' lë' Juan.

⁶² Ní'irö bulu'lá' bulu'lu'ísinë', gula'nábinë' xúzibi' nacxi ré'ënnë' gu'ë labi'. ⁶³ Zacarías na' gunabë' tu blágado', ate' buzúajë' lahui caní: Juan lëbi'. Bulu'bánninë' yúgu'të'. ⁶⁴ La' ní'isö böáljatë ru'ë Zacarías na', en buguítjatë lúdxë'ë, ate' bë'ë didza' le gulu'ë Dios yöl-la' ba. ⁶⁵ Ní'irö guládxinë', en bulu'bánninë' yúgu'të dzaga yu'u quégaquië', ate' yúgu'të yódzödo' nacuá' lu guí'ado' luyú Judea, guzé didza' ca guca lë ni. ⁶⁶ Gula'zá' ládxi'gaca yúgu'të nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácatë Xanru' zóalenë'-bi'.”

Didza' bë'ë Zacarías uláz queë' Dios

⁶⁷ Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë' Dios, rnnë':

⁶⁸ ¡Yöl-la' ba Dios, Xángaca bönachi Israel
tu' buduyúë' rë'u, bönachi queë', en böá'uë' rë'u!

⁶⁹ ¡Gusól-lë'ë queëru' Bönni' usölë' rë'u,
len yöl-la' huáca zxön queë'!
Bönni' ni guljë' ládajgaca di'a dza queë' David,
huen dxin queë' Dios.

⁷⁰ ¡Dza ni'te guzxí' lu në'ë gunë' ga gaca caní!
Raca ca na' gunné' lu ruá'agaquië' bönni' gulu'ë didza' uláz queë'.

⁷¹ Guzxí' lu në'ë usölë' rë'u
lu ná'agaca nupa tequi rë'u zi',
enca' lu ná'agaca nupa biti' ta'lé'e rë'u dxi'a.
⁷² Guzxí' lu në'ë huéchi' ládxë'ë xuz gudödi queëru',
en tsöjnenë' le guzxí' lu në'ë le naca lá'ayi.

⁷³ Lë ni benë' tsutsu xtídzë'ë, en guzxí' lu në'ë,
le gunë' queë' Abraham, xuz gudödi queëru',
le naca tu le ral-la' gunë' queëru' rë'u.

⁷⁴ Guzxí' lu në'ë usölë' rë'u

lu ná'agaca nupa biti' ta'lé'e rë'u dxi'a
para cabirö gádxiru' gunru' xichinë' Lë',
⁷⁵ en para gácaru' ba'a ladxi', en idú dxi'a
lahuë' Lë' yúgu'të dza sóaru' ibanru'.

⁷⁶ Li', zxí'ina'do', si' lo' bönni' ru'ë didza' uláz queë' Dios unná bë'
tu' tsöjnöru' ca Xanru' caz, en upó'o nöza ga tödë'.

⁷⁷ Gunu' ga ila'nözi bönachi queë' ca gaca ulu'lágaca,
en ca na' uniti lahuë' Dios dul-la' nabága'gaca.

⁷⁸ Caní gaca, tu' ruhuéchi'da' ládxë'ë Dios rë'u,
en runë' ga tsení' queëru' Bönni' na' náquië' bení' idú.

⁷⁹ Lë' uzení'ë quégaca nupa nacuá' gapa naca chul-la,
en gapa nacuá' nupa chizóa ilátigaca
para ugú'ë rë'u nöza ga cö'ö dxi ládxi'do'oru'.

⁸⁰ Guzxönbi' bi'i bönni'do' na', en bidipa ládxi'bi'. Guzóasibi' gapa
naca lu lataj cá'asö cate' bidxinrö dza buluí'i lobi' lógaca bönachi Israel.

Le guca cate' gúlajbi' Jesús

(Mt. 1:18-25)

2 ¹ Lu dza na' gunná bë'ë Augusto César, bönni' Roma, ila'yaza lu
guichi yúgu'të bönachi nacuá' yödzölió. ² Cate' gusí lo ta'yaza lu
guichi caní, rinná bë'ë bönni' lë' Cirenio luyú Siria. ³ Yúgu'të bönachi
yöjaca yödzö que queé'guequi ga na' zeaj nababa para ila'yaza lu guichi.
⁴ Guzë'ë José yödzö Nazaret luyú Galilea, sa'yéajë' luyú Judea, en
bidxinë' yödzö Belén, ga ni' gulgë' David, tu' gulgë' José ládajgaca di'a
dza queë' David na'. ⁵ Guyijë' José ni' para tsázië' lu guichi, ate'
dzágabi'-në' María, bi'i nigula nazí' lu ná'abi' utsaga ná'alénbi' lë', en
chizóa sóabi' bí'ido' queë'bi'. ⁶ Cate' ni' nacu'ë lu yödzö Belén, bidxín
dza sóabi' bí'ido' queë'bi'. ⁷ Buzóanu-bi' tubi' bi'i bönni'do', bi'i huáca
queë'nu. Buchólinu-bi' yugu' lári'do', ate' gudíxjanu-bi' tu lu yú'udo' ga
tun chi'i le táguba' böa' quégaca bönachi yú'ugaca nöza. Caní guca, tu'
cabí bidxöli lataj ila'cu'ë lu yu'u ga ni' ta'dxín bönachi yú'ugaca nöza.

Tu'luí'i lahuë' gubáz lá'ayi queë' Dios ga nacu'ë bönni' tu'yúë'-ba' bö'cu' zxila'

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la'
guixi', tapa chí'igaquië'-ba' chi'i dzó'ölö. ⁹ La' buluí'itë lahuë' gubáz
lá'ayi queë' Xanru' ga na' nacu'ë. Yöl-la' bení' queë' Xanru' buzení' ga
na' nacu'ë, ate' guládxinë'. ¹⁰ Ní'irö gubáz lá'ayi na' gudxë' légaquië',
rnnë':

—Biti' gádxili'. Na'a rusiyönda' libí'ili' didza' le gun ga udzëjade'eli',
le ulu'zí' ca' xibé yúgu'të bönachi. ¹¹ Na'a chigúlajbi' lu ladzë' David Nu
usölá libí'ili'. Nu ni naca Cristo, Xanru'. ¹² Lë' ni gaca bé'ëbi'. Udzólili'-bi'

Bí'ido' na', narólibi' yugu' lári'do', en dēbi' tu lu yú'udo' ga tun chi'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsárido'os bulu'luí'i lógaquië' zíanrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nné':

¹⁴ iYöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxi'ë Dios légaquië'!

¹⁵ Cate' bulu'zé'ë gubáz lá'ayi na' ga ni' nacu'ë, sōjhuójgaquië' yehua' yubá, ní'irö gulé luzé'ë tuë' ia'tué' bönni' uyú bö'cu' zxila' na', ta'nné':

—Uyéajtsöca'ru' Belén para ilé'eru' lē ni chiguca ca na' chibusiýönnē' Xanru' rē'u.

¹⁶ La' yōjácatië', ate' yōjxáca'gaquië' María len José, enca' bí'ido' na', dēbi' tu lu yú'udo' ga tun chi'i le táguba' böa' quégaca bönachi yú'ugaca nöza. ¹⁷ Cate' bila'lé'enē' lēbi', gula'guíxjö'ë lē na' si' busiýönnē' gubáz lá'ayi na' légaquië' ca naca queébi' bí'ido' na'. ¹⁸ Bulu'bani yúgu'tē nupa bila'yöni didza' gulu'ë bönni' tu'yú'ë bö'cu' zxila' na'. ¹⁹ María gulú'usö icja náganu didza' ni, ate' guzá' ládxi'nu ca naca que. ²⁰ Sōjhuójgaquië' bönni' na' tu'yú'ë-ba' bö'cu' zxila', tunē' zxön Dios, en ta'gu'ë Lē' yöl-la' ba ni'a que yúgu'tē lē na' bila'yönnē', en bila'lé'enē', le guca ca na' busiýönnē' gubáz lá'ayi na' légaquië'.

Ta'gu'ë-bi' bí'ido' Jesús lu nē'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipéla'bi' lē na' naca bē' néquibi' queë' Dios, ate' gulu'ë labi' Jesús ca na' chibē' cazē' labi' gubáz lá'ayi na' zí'alö cate' si' tsú'ubi' lē'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bē' xibá queë' Moisés, gula'ché'ë-bi' bí'ido' Jesús yödzö Jerusalén para ila'gu'ë-bi' lu nē'ë Xanru' Dios. ²³ Caní gulunē', tu' nazúaj lu guichi lu xibá queë' Xanru' le rnna: “Yúgu'tēbi' bi'i bōnni'do' nácagacabi' bi'i zí'alö queénu xiná'agacabi', ulu'béajē'-bi' quez queë' Xanru' Dios.”

²⁴ Que lē ni na' yōjáquië' ni' para ilútië'-ba', en ila'gú'ë-ba' lahuē' Dios chópaba' gúgudo' o chópaba' budödu' ca na' rinná bē' xibá queë' Xanru' Dios.

²⁵ Dza ní'isö zoë' tu bönni' lē' Simeón lu yödzö Jerusalén. Bönni' ni náquië' tsahui', en reaj ládxi'ë Dios. Ribözē' Bönni' na' isól-lē'ë Dios, Bönni' na' gácalenē' bönachi Israel. Dios Bö' Lá'ayi zóalenē' Simeón na', ²⁶ en chibulu'finē' lē' biti' gátië' cate' ilé'erönē' Cristo, Bönni' na' isól-lē'ë Xanru' Dios. ²⁷ Bidxinē' Simeón na' chila yudo' tu' guché'ë Dios Bö' Lá'ayi lē' ni'. Cate' xuz xiná'abi' gula'ché'ë-bi' bí'ido' Jesús chila yudo' para ilunē' queébi' ca rinná bē' xibá na', ²⁸ ní'irö bunidē'-bi' Simeón na', en guyéaj ládxi'ë Dios, rnnē':

²⁹ Xana', na'a huáca gunnu' neda' lataj gátia', soa dxi ládxa'a

tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usölá bönachi,

³¹ Nu na' ulú'u lahui lógaca yúgu'të bönachi.

³² Lëbi' nácabi' bení' le uzení' bönachi izá'a,
en nácabi' ca' bení' quégaca bönachi Israel quiu'.

³³ Bulu'bánninë' José, en María, xiná'abi' bí'ido' Jesús, ca naca lë na' gunné' Simeón ca naca queébi' Jesús. ³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zían, ate' ulu'huóasa bönachi zían ladaj bönachi Israel. Gácabi' tu le naca bë', ate' ila'nnë' bönachi queébi'. ³⁵ Gaca caní para ila'lá' lahui le ta'zá' ládxi'gaca bönachi zían. Yugu' lë ni ilaca quiu' ca tu guíë tuchi' le tsaza ládxi'do'o.

³⁶ Ana, nigula ruí'inu didza' uláz queë' Dios, zóanu ca' ni'. Nácanu zxi'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', ³⁷ ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në' Dios, runnu gubasa, en rulídzanu-në' Dios. ³⁸ La' ná'asö bidxintënu ni', rënu-në' Dios: "Xclenu'." Gudíxjöi'inu yúgu'të bönachi ca naca queébi' bí'ido' Jesús, bönachi na' nacuá' Jerusalén, nupa ta'böza dza idxín Nu na' isól-lë'ë Dios para gácalen bönachi.

Söjhuójgaquië' José, en María yödzö Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuójgaquië' ládzagaquië' Nazaret luyú Galilea.

⁴⁰ Guzxönbi' bí'ido' Jesús, en bidipa ládxi'bi'. Guta' queébi' yöl-la' réajni'i, ate' zxön naca le ruzá' ládxi'ë' queébi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. ⁴³ Cate' gudödi laní, söjhuójgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús. ⁴⁴ Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zë'ë. Ní'irö cate' bulu'guiljë'-bi' gapa nacuá' di'a dza quégaquië', en gapa nacuá' nupa núnbë'gaquië' ⁴⁵ bití' bulu'dzölinë'-bi'. Que lë ni na' yöjhuójgaquië' Jerusalén, söjdíljagaquië'-bi'.

⁴⁶ Cate' chiguca dza bunni, bulu'dzólinē'-bi' ga naca chila yudo', rō'ōbi' gatsaj láhui'lē' bōnni' yudo' tu'sédinē'. Ruzé nágabi' didza' tu'ē, en rinaba yúdxibi' légaquiē'. ⁴⁷ Bulu'bani yúgu'tē nupa bila'yōni didza' bé'ēbi' ca naca yōl-la' réajni'i queébi', en ca nácagaca didza' bubí'ibi'.

⁴⁸ Cate' bila'lé'enē'-bi' xuz xiná'abi', bulu'báninē', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queétu'? Buyútsöca', len yōl-la' ruúbi ruguí'i neda', en xuzu' buguíljatu' li'.

⁴⁹ Ní'irō gúdxibi' Jesús légaquiē', rnnabi':

—¿Bizx que buguíljali' neda'? ¿Naru' cabí nózili' run bayudxi guna' xichinē' Xuza'?

⁵⁰ Biti' gula'yéajni'inē' xuz xiná'abi' didza' na' gúdxibi' légaquiē'.

⁵¹ Jesús bóajlenbi' légaquiē', budxinbi' Nazaret, ate' benbi' ca rnna xtídza'gaquiē' xuz xiná'abi'. María, xiná'abi' Jesús, gulú'usönu icja ládxi'do'onu yúgu'tē lē ni. ⁵² Ráta'rō yōl-la' réajni'i queébi' bi'i Jesús, en rizxōnbi'. Burúajbi' dxi'a lahuē' Dios, en lógaca bōnachi.

Libán runē' Juan, bōnni' ruquilē' bōnachi nisa

(Mt. 3:1-12; Mr. 1:1-8; Jn. 1:19-28)

3 ¹ Cate' chiguca chinu iz rinná bé'enē' Tiberio César idútē yōdzölió, rinná bē'ē Poncio Pilato luyú Judea, ate' Herodes rinná bē'ē ca' luyú Galilea. Felipe, bóchē'ē Herodes na', rinná bē'ē luyú Iturea, en luyú Traconite, ate' Lisantias rinná bē'ē luyú Abilinia. ² Yugu' dza na' nácagaquiē' bixúz lo Anás, en Caifás, ate' la' ná'asö Dios bé'lenē' Juan, zxí'inē' Zacarías, didza' cate' ni' zoē' Juan lu lataj cá'asö. ³ Ridé' Juan ni yúgu'tē lataj nacuá' ra' yegu Jordán, runē' libán ca ral-la' ila'dila nisa nupa tu'bí'i ládxi'gaca para uniti lahuē' Dios dul-la' nabága'gaca. ⁴ Guca caní ca na' nazúaj lu guichi lá'ayi yugu' didza' bē'ē Isafás, bōnni' bē'ē didza' uláz queē' Dios, rnna:

Riyón chi'ē bōnni' rulidzē' lu lataj cá'asö, rnnē':

“Buli'pá'a nöza lu icja ládxi'do'oli' para idxín Xanru' queéli'.

Buli'béaj li yugu' nöza lasi ga tödē'.

⁵ Ral-la' ulígaca yúgu'tē gapa naca röga',

en ulu'huöáca lachi' yúgu'tē guí'a sibi, en guí'ado'.

Ral-la' ulu'rúaj li nöza nayecja nabí'igaca,

ate' ulu'huöáca dxi'a nöza guiój.

⁶ Ila'lé'eni yúgu'tē bōnachi Bōnni' na' isól-lē'ē Dios,

Nu usölá bōnachi.”

⁷ Cate' bila'rúaj bōnachi zían para ila'dila nisa lu nē'ē Juan, lē' gudxē' légaquiē':

—Libi'ili', di'a dza quégacaba' bëla sínia'. ¿Zoa nu buluí'i libí'ili' ral-la' izxúnajli' yōl-la' rusiúdxí si' gaca quégaca bōnachi? ⁸ Na'a, guli'gún le ilaca bë' chibubí'i ládxi'li', en biti' sa' ládxi'li', biti' innali': “Nácatu'

tsahui' tu' nácatu' di'a dza queë' Abraham", tu' rea' libí'ili', huáca quélè'ë Dios yugu' guió'j ni, en gunë' ga ulu'huöáca di'a dza queë' Abraham. ⁹ Nácali' ca yugu' yaga. Chizóa riböza guíë huága para ichugu yugu' yaga. Yúgu'të yaga biti' ta'bía le naca dxi'a, ila'chúguië' yaga na', en ila'gu'ë léguequi lu guí'.

¹⁰ Ní'irö bönachi nacuá' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu biti' dë que, ate' nu dë le gagu, lësca' caní ral-la' quisi quégaca nupa biti' dë le ilágugaca.

¹² Bal-lë' bönni' tu'quixjë' lázagaca bönachi uláz que yödzö zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³ Juan gudxë' légaquië':

—Biti' uquízjaröli' tsca le chigunnë' bönni' yú'uli' lu në'ë.

¹⁴ Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizxaj libí'ili', pero guli'tsaza ládxi'li' tsca rázjali'.

¹⁵ Ta'zá' ládxi'gaca bönachi na' ta'böza Bönni' na' ral-la' isól-lë'ë Dios, channö náquië' Juan na' Bönni' lë' Cristo. ¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluí'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudé'ë ni'e. ¹⁷ Zönë' lu në'ë böcö' queë', ate' ulubë' ga rilubi xzoa' xtila queë', lë' ni ruluí'i le gaca quégaca bönachi. Utubë' xzoa' xtila, en cu'ë le xilataj, pero bëbu que uzégui'ë lu guí' le catu caz ulu.

¹⁸ Ca náagaca didza' ni, en ia'zica'rö zían didza' le guchízië' icja náagaca bönachi, benë' libán Juan lógaquië' que didza' dxi'a. ¹⁹ Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'. ²⁰ Ní'irö benë' Herodes tu le nácarö huiá' dö', gulu'ë Juan na' lidxi guíë.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, ²² ate' bö'tjë' Dios Bö' Lá'ayi, bidxinë' ga na' zoë' Jesús. Buluí'i

lahuë', riné'ë ca riná' tuba' gu'dödo', ate' biyón chi'i Nu ruí'i didza'
yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

Yugu' xuz xinë'e gudödi queë' Jesús

(Mt. 1:1-17)

²³ Cate' gusí lahuë' runë' xichinë' Jesús, yu'ë ca chi uruá' iz.
Téquiguequi bönachi náquië' zxí'inë' José. Jesús náquië' zxí'ini xi'sóë'
Elí,

nu na' náquië' xúzinu María, nigula queë' José na'.

²⁴ Elí na' gúquië' zxí'inë' Matat,

nu ni guca zxí'inë' Leví,

nu ni guca zxí'inë' Melqui,

nu ni guca zxí'inë' Jana,

nu ni guca zxí'inë' ia'túë' José.

²⁵ José ni gúquië' zxí'inë' Matatías,

nu ni guca zxí'inë' Amós,

nu ni guca zxí'inë' Nahum,

nu ni guca zxí'inë' Esli,

nu ni guca zxí'inë' Nagai.

²⁶ Nagai na' gúquië' zxí'inë' Mat,

nu ni guca zxí'inë' ia'túë' Matatías,

nu ni guca zxí'inë' Semei,

nu ni guca zxí'inë' ia'túë' José,

nu ni guca zxí'inë' Judá.

²⁷ Judá na' gúquië' zxí'inë' Joana,

nu ni guca zxí'inë' Resa,

nu ni guca zxí'inë' Zorobabel,

nu ni guca zxí'inë' Salatiel,

nu ni guca zxí'inë' Neri.

²⁸ Neri na' gúquië' zxí'inë' ia'túë' Melqui,

nu ni guca zxí'inë' Adi,

nu ni guca zxí'inë' Cosam,

nu ni guca zxí'inë' Elmodam,

nu ni guca zxí'inë' Er.

²⁹ Er na' gúquië' zxí'inë' Josué,

nu ni guca zxí'inë' Eliezer,

nu ni guca zxí'inë' Jorim,

nu ni guca zxí'inë' ia'túë' Matat.

³⁰ Matat na' gúquië' zxí'inë' Leví,

nu ni guca zxí'inë' Simeón,

nu ni guca zxí'inë' Judá,

nu ni guca zxí'inë' ia'túë' José,

nu ni guca zxí'inë' Jonán,
nu ni guca zxí'inë' Eliaquim.

³¹ Eliaquim na' gúquië' zxí'inë' Melea,
nu ni guca zxí'inë' Mainán,
nu ni guca zxí'inë' Matata,
nu ni guca zxí'inë' Natán.

³² Natán na' gúquië' zxí'inë' David,
nu ni guca zxí'inë' Isaí,
nu ni guca zxí'inë' Obed,
nu ni guca zxí'inë' Booz,
nu ni guca zxí'inë' Salmón,
nu ni guca zxí'inë' Naasón.

³³ Naasón na' gúquië' zxí'inë' Aminadab,
nu ni guca zxí'inë' Aram,
nu ni guca zxí'inë' Esrom,
nu ni guca zxí'inë' Fares,
nu ni guca zxí'inë' ia'túë' Judá.

³⁴ Judá na' gúquië' zxí'inë' Jacob,
nu ni guca zxí'inë' Isaac,
nu ni guca zxí'inë' Abraham,
nu ni guca zxí'inë' Taré,
nu ni guca zxí'inë' Nacor.

³⁵ Nacor na' gúquië' zxí'inë' Serug,
nu ni guca zxí'inë' Ragau,
nu ni guca zxí'inë' Peleg,
nu ni guca zxí'inë' Heber,
nu ni guca zxí'inë' Sala.

³⁶ Sala na' gúquië' zxí'inë' Cainán,
nu ni guca zxí'inë' Arfaxad,
nu ni guca zxí'inë' Sem,
nu ni guca zxí'inë' Noé,
nu ni guca zxí'inë' Lamec.

³⁷ Lamec na' gúquië' zxí'inë' Matusalén,
nu ni guca zxí'inë' Enoc,
nu ni guca zxí'inë' Jared,
nu ni guca zxí'inë' Mahalalel,
nu ni guca zxí'inë' ia'túë' Cainán.

³⁸ Cainán na' gúquië' zxí'inë' Enós,
nu ni guca zxí'inë' Set,
nu ni guca zxí'inë' Adán,
nu ni guca ca zxí'ini cazë' Dios.

Satanás tu' xihui' ré'ëni usubaga' Jesús dul-la'

(Mt. 4:1-11; Mr. 1:12-13)

4 ¹ Buzé'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guché'ë Jesús lu lataj cá'asö. ² Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. ³ Ní'irö tu' xihui' na' gudxi Jesús, rnna:

—Channö naca cazu' Li' Zxí'inë' Dios, gunnátsöca' ulu'huóaca guió'j ni yöta xtila.

⁴ Bubi'ë didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵ Ní'irö guché' tu' xihui' na' Jesús ga naca tu lu guí'a sibi ate' tu chí'ido'osö buluí'i Lë' yúgu'të xilátjagaca nupa ta'nná bë' yödzölió. ⁶ Tu' xihui' na' rë Jesús, rnna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu ré'ënisida' ruá'a que. ⁷ Channö Li' uzóa zxibu' lahua', en gunu' neda' zxön, yúgu'të lë ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: “Xanu' Dios tseaj ládxu'u-në', en tuzë' Lë' gunu' xichinë'.”

⁹ Ní'irö tu' xihui' na' guché' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni ¹⁰ tu' nazúaj lu guichi lá'ayi, rnna:

Dios isól-lë'ë gubáz lá'ayi queë', ilácalenë' Li'.

¹¹ Lu ná'agaquië' ulu'chisë' Li' para cabí tsöjchégu'u guió'j, en bití' gunu' zì' ni'u.

¹² Bubi'ë didza' Jesús, rë' le:

—Nazúaj lu guichi lá'ayi le rë netu': “Biti' si' bë'u Xanu' Dios.”

¹³ Cate' bití' budzöli tu' xihui' na' ia'tú le si' bë' Jesús, buzá' ga zoë' tu chí'ido'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Bóajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzé' didza' ca naca queë', ate' bila'yöni bönachi nacuá' yúgu'të yödzö idú gásibi'ilö. ¹⁵ Busédinë' Jesús bönachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'të bönachi gulún Lë' zxön.

Le benë' Jesús yödzo Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzo Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyázië' lu yu'u ga tu'dubë' tu'sëdë' bönni' judío queë' Dios, ate' guzuínë' para ulabë' tu le nazúaj lu guichi lá'ayi. ¹⁷ Bulu'dödë' lu në'ë Jesús guichi ga na' nazúaj didza' bë'ë Isaías, bönni' bë'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

¹⁸ Zóalenë' Bö' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusól-lë'ë neda' para una' nupa raca zi' ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usölá' bönachi zoa nu run léguequi zi',

¹⁹ en guna' libán que dza ruzá' ládxi'ë Xanru' Dios quégaca bönachi.

²⁰ Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. ²¹ Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

²² Yúgu'të' gula'nnë' dxi'a queë', en bulu'bánninë' ca naca didza' dxi'a ru'ë, ate' ta'nnë':

—¿Naru' calëga bönni' ni zxí'inë' José?

²³ Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: “Li', bönni' ruún bönachi, bun cuinu'.” Lësca' caní huëli' neda': “Yugu' le biyónitu' benu' Capernaum, ben ca' ga ni naca ladzu'.”

²⁴ Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, biti' tun bönachi uládz queë' lë' bal. ²⁵ Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guió'j idú ca tsonna iz yu' xopa beo', ate' guca gubín luyú na', ²⁶ pero Dios biti' gusól-lë'ë Elías na' ga nacuá'anu nigula uzëbi nabábagacanu Israel, pero gusól-lë'ë lë' ga na' zóanu tu nigula uzëbi lu yödzo Sarepta, le nababa yödzo Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero biti' böáquië' nu bönni' nútsë'ë ladaj bönachi Israel na', pero böáquië' tuzë' Naamán, bönni' nababë' luyú Siria.

²⁸ Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios. ²⁹ Ní'irö gula'yasë', en bulu'béajë' Jesús ní'ilö ra' yödzo. Gula'ché'ë Lë' ga naca lë'e guí'a guió'j ga na' dë

ládzagaquië' para ulu'suláduë' Lë' ga naca lë'e guí'a guiój na'. ³⁰ Ní'irö gudödë' Jesús gatsaj láhui'lö ga na' nacu'ë, söhuóajtë'.

Tu bönni' yu'u lë' bö' xihui'

(Mr. 1:21-28)

³¹ Ní'irö guyijë' Jesús yödzö Capernaum luyú Galilea, ate' busédinë' bönachi yugu' dza lá'ayi quégaquië' bönni' judío. ³² Bulu'bánninë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

³³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza', ³⁴ rnnë':

—iBusán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

³⁵ Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacuá' ni'. Burúajtë lu bönni' na', en bíti'rö bi ben queë'. ³⁶ Bulu'bánninë' yúgu'të', en gulu'ë didza' tuë' len ia'tué', ta'nné':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bé'enë' yugu' bö' xihui', ate' tu'rúajtë bö' xihui' na'.

³⁷ Guzé didza' ca naca queë' Jesús, ate' bila'yöni bönachi yúgu'të yödzö idú gásibi'ilö.

Ruúnë' Jesús xiná'anú nígula queë' Pedro

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajtë lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anú nígula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu.

³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bé'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacuá'len léguequi nupa na' te'e que queéguëqui yödzhuë' bila'dxín ni', ate' dujuá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi.

⁴¹ Bulu'rúaj ca' zían bö' xihui' yú'ugaca bönachi te'e na'. Ta'bódxí'a bö' xihui' na', ta'nná:

—Li' nacu' zxí'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nóziguequi náquië' Cristo.

Runë' Jesús libán luyú Galilea

(Mr. 1:35-39)

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bö'nachi zían ni', tu'guílaj Jesús. Cate' bila'dxinë' ga na' zoë', gulé'éniguequinë' ulu'tsenë' Lë', para cabí uzé'ë ga na' naculé. ⁴³ Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zícá'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusól-lë'ë neda' ni.

⁴⁴ Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

Ta'dzunba' böla zían

(Mt. 4:18-22; Mr. 1:16-20)

5 ¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bö'nachi zían Lë' para ila'yöni xtídzë'ë Dios. ² Ní'irö bilé'enë' Jesús chopá bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxón böla lé'egaca bárcodo' na', en ta'guibë' yöxaj böla quégaquië'. ³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'láti'do' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en ró'ösë' ca' ni' rusédinë' bö'nachi zían nacuá' lu yu bidxi na'. ⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queéli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en bití' bi böla nazónitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' zían'tëröba' böla, ate' réquitiqui' iröza' yöxaj böla na'. ⁷ Ní'irö bulu'lá'a bulu'luí'isinë', bulu'lidzë' luzá'agaquië' naculé ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzé'ë-ba' böla irópatë bárcodo' na', ate' chirequi ulu'huótaj bárcodo' na' lu nisa. ⁸ Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunné' tu' radxi ridzóbinë' Pedro ni'a quégacaba' böla zían na' gula'zóngaqüë'-ba', en lësca' caní guca quégaca nupa nacuá'len lë'.

¹⁰ Guladxi gula'dzöbinë' ca' Jacobo, en Juan, yugu' xzí'inë' Zebedeo, nupa ni nácagaca luzé'ë Simón Pedro na'. Ní'irö Jesús rë' Simón na', rnnë':

—Bití' gádxinu'. Na'a isí lo' ichë'u quia' bö'nachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sōjácalenë' Jesús.

Ruúnë' Jesús tu bönni' ré'enë' huë' nudzu' ruzödi

(Mt. 8:1-4; Mr. 1:40-45)

¹² Cate' zoë' Jesús tu lu yödzo ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

¹³ Ní'irö bulí nē'ë Jesús, en gudanë' lë'. Rë' lë':

—Ré'ënda'. Gacu' dxi'a.

La' gubídxitë huë' nudzu' queë' bönni' na'. ¹⁴ Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yōjluí'i cuinu' lahuë' bixúz, ate' yōjnōdzaj que yudo' le ruluí'i nuhuóácu' dxi'a ca gunná bë'ë Moisés, lë' na' uluí'i légaquië' chiböácu'.

¹⁵ Guzëtërö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugúë' yödzöhuë' té'eguequi. ¹⁶ Ní'irö buzé'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin

(Mt. 9:1-8; Mr. 2:1-12)

¹⁷ Ia'tú dza, cate' ni' rusédinë' Jesús bönachi, ró'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu nē'ë Jesús yöl-la' huáca queë' Xanru' Dios tu ruúnë' bönachi te'e nacué' ni'. ¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. ¹⁹ Cate' bití' gula'dzölinë' nacxi ilunë', tu' nacué' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guíxjë' lë' gatsaj láhui'lö bönachi ni' lahuë' Jesús. ²⁰ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹ Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nné': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

²² Réquibe'enë' Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní? ²³ Bití' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun

ga chasë', en sè'e ni'ë. ²⁴ Guna' ga inózüli' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵ La' guyásatë' bönni' huë' na' lógaquië', ate' bu'ë lë na' gúti'në', en söhuóje' lidxë', rigu'ë Dios yöl-la' ba. ²⁶ Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

²⁷ Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, röö'ë ga na' ruquízxjë', ate' Jesús rë' lë':

—Gudá' neda'.

²⁸ La' guyásatë' Leví, ate' bucá'anë' yúgu'të, en sa'yéajlenë' Jesús.

²⁹ Gudödi ni' benë' Leví na' tu güí'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bó'lenë' légaquië' tahuë'. ³⁰ Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bönni' uquízxaj, en ia'zica'rë' bönni' dul-la'?

³¹ Bubi'ë didza' Jesús, rë' légaquië':

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. ³² Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

³³ Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' tē'aj tahuë'?

³⁴ Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'?

³⁵ Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

³⁶ Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udé'ë lë'e lari' tēbi. Channö gunë' caní, calégasö gaca ditaj lari' cubi

na', pero lári'do' na' birúaj lë'e lari' cubi na' biti' tsöjlóza lari' tēbi na'.
³⁷ Lësca' caní, cuntú nu bönni' riguë'ë xisi uva cubi lu buzudi guídi gula.
 Channö nu gun caní, xisi uva cubi na' uchöza' buzudi guídi gula, ate'
 ilalaj xisi uva na', ate' gaca ditaj buzudi guídi gula na'. ³⁸ Que lë ni na'
 ral-la' cá'aru' xisi uva cubi lu buzudi guídi cubi, ate' irópatë ilaca chi'i.
³⁹ Channö zoa nu rë'aj xisi uva gula, biti' guë'ënitë guí'aj xisi uva cubi,
 tu' rnna: "Nácarö sizxi' xisi uva gula na'."

Bönni' usëda queë' Jesús ta'lecjë' do zxoá' xtila dza lá'ayi

(Mt. 12:1-8; Mr. 2:23-28)

6 ¹ Cate' naca tu dza lá'ayi quégaquië' bönni' judío, ridödë' Jesús
 gapa dë yöla zxoá' xtila, ate' bönni' usëda queë' ta'lecjë' do ga
 dxía zxoá' xtila. Ta'zxúbi'ni ná'agaquië' le, en tahuë'. ² Ní'irö
 gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún
 ca' nupa nacuá'len lë'? ⁴ Guyázië' lu yu'u queë' Dios, en guzxi'ë yöta
 xtila tu'cu'ë lahuë' Dios, lë na' biti' ral-la' gáguru', pero tuz bixúz dë
 lataj ilahuë', ate' gudahuë' David le, en bë'ë ca' quéguequi nupa
 nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu
 yu'u ga tu'dubë' tu'sëdë' queë' Dios, en busédinë' nupa nacuá' ni'. Zoë'
 ca' tu bönni' ni' narequi' në'ë ibëla. ⁷ Yugu' bönni' yudo' tu'sédinë', en
 yugu' bönni' yudo' fariseo tu'yúë' Jesús para ila'lé'enë' channö únë'
 bönni' na' cate' naca dza lá'ayi quégaquië' para ulu'dzólinë' nacxi
 ulu'zéguië' Lë' didza'. ⁸ Réquibe'enë' Jesús le ta'zá' ládxi'gaquië', ate'
 gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. ⁹ Ní'irö Jesús gudxë' yugu' bönni'
 yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza
 lá'ayi gunru' le naca dxi'a o gunru' le ruá' dö'? ¿Naru' dë lataj
 uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyúë' Jesús yúgu'të bönni' na' nacu'ë gásibi'ilë', ate' gudxë'
 bönni' huë' na':

—Bulí no'o.

Bulí në'ë bönni' na', ate' la' böacatë në'ë na'. ¹¹ Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesús.

Riböö' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bë'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' guröö' chínnuë' para iláquië' gubáz queë'. ¹⁴ Bulidzë':

Simón, (lë' ca' Pedro),

Andrés, (böché'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ruí'i ládxë'ë yödzö queë'),

¹⁶ Judas, (böché'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönachi zían

(Mt. 4:23-25)

¹⁷ Jesús bótjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzö luyú Judea, en yödzö Jerusalén, en yugu' yódzödo' dégaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zé náagaca xtídzë'ë Jesús, en ulu'huöaca lu yödzöhuë' té'eguequi.

¹⁸ Bulu'huöáquië' ca' bönni' ni' ta'guí'i ta'záquië' lu ná'agaca bö' xihui'.

¹⁹ Yúgu'të bönachi zían na' tuí'i ládxí'gaca ila'gán Jesús tu' ruúnë' léguequi len yöl-la' huáca queë'.

Nupa náagaca bica' ba, en nupa náagaca bica' bayechi'

(Mt. 5:1-12)

²⁰ Ní'irö buyüë' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queé'li' lataj ga rinná bë'ë Dios.

²¹ 'Bica' ba libí'ili' ridunli' le gunnë' Dios queé'li', tu' huóljali'.

'Bica' ba libí'ili' ribódxili' tu' bi nadéli'li' le naca tsahui', tu' huadxín dza uzxídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nné zi' queé'li', en ulu'cá'ana cá'asö le nazí'i lali' ca tu le naca xihui' tu' dá'ali' neda', Bönni' Guljë' Bönachi.

²³ Buli'sí' xibé dza na', en buli'dzeja, tu' naca zxön le guequi queéli' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

²⁴ 'Bica' bayechi' libí'ili', dë yöl-la' tsahui' queéli', tu' chidé le ruzí'ili' xibé.

²⁵ 'Bica' bayechi' libí'ili' nuhuó'aj nudzé'eli' na'a, tu' huadunli'.

'Bica' bayechi' libí'ili' ruzí'dxili' na'a, tu' huí'inili', en cödxí yéchi'li'.

²⁶ 'Bica' bayechi' libí'ili' ta'nné yúgu'të bönachi dxi'a queéli'. Lësca' caní gulunë' xuz xtó'oli', gula'nné' dxi'a quégaquië' bönni' gula'zí' yë'ë, gula'nné' náca'gaquië' bönni' tu'ë didza' uláz queë' Dios.

Ral-la' idxí'iru' nupa biti' ta'lé'e rë'u dxi'a

(Mt. 5:38-48; 7:12)

²⁷ Gunné' ca' Jesús:

—Libí'ili' zóali' ni, en riyónili' xtídza'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'. ²⁸ Guli'nabi Dios gaca dxi'a quégaca nupa tua' dö' queéli', en buli'lidzë' Dios inábili'-në' gácalenë' nupa ta'nné zi' queéli'. ²⁹ Channö nu capa' tsölá'a xagu', buzé ia'tsölá'a ca' xagu'. Channö nu cúa lari' naxó'a cúdu'u, bë' lataj cúa ca' xzo'. ³⁰ Núti'tës nu bi inaba le dë quiu', bunödzej que, ate' nu cúa le nequi quiu', biti' unabu' le. ³¹ Ca ré'ënili' ilún bönachi queéli', lësca' caní guli'gún quéguequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'iguequi légaquië'. ³³ Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tunë' bönni' dul-la'.

³⁴ Channö runódzjali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzjë' quégaca nupa tun dul-la', tu' tunë' löza ulu'bí'i quégaquië' lë na' bulu'nödzjë'.

³⁵ Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nödzaj quégaca bönachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' zxí'ini cazë' Dios, Nu nácatërö lo, tu' runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dö'.

³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë yúgu'të bönachi.

Biti' ral-la' ichugu bé'ëru' que luzá'aru'

(Mt. 7:1-5)

³⁷ Gunné' ca' Jesús:

—Biti' ichugu bé'ëli' que luzá'ali', ate' cuntú nu ichugu bë' queéli'. Biti' cuéaj bé'ëli' que luzá'ali', ate' cuntú nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödzaj que luzá'ali',

ate' Dios gunnë' queéli'. Ulu'nödzjë' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la iché'ë ia'túë' bönni' lo chul-la? Biti' ca' gaca, tu' ila'bixë' iropë' tu lu yeru. ⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ '¿Bizx que ruyú' bébudo' yu'u guió'j lahuë' böchi' luzó'o, en biti' rilé'enu' le zxön yu'u guió'j lo cazu'? ⁴² ¿Naru' huácatsö guío'-në' böchi' luzó'o: “Bócha'a, benna lataj cueja' bébudo' yu'u guió'j lo”, en biti' rilé'enu' le zxön yu'u guió'j lo cazu'? Li', bönni' ruluí'isö tsahui' cuinu', guléaj zí'alö le zxön yu'u guió'j lo cazu', ate' ní'irö ilé'enu' dxi'a para cueju' bébudo' yu'u guió'j lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

⁴³ Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a. ⁴⁴ Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. ⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u

(Mt. 7:24-27)

⁴⁶ Gunnë' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bé'eda' libí'ili'? ⁴⁷ Uluí'ida' libí'ili' ca naca nu na' za' quia', en riyöni xtídza'a, en run ca rnna xtídza'a. ⁴⁸ Nu ni naca ca tu bönni', cate' benë' lidxë', guchó'önë' ga rë', en guléquië' xilibi yu'u ga naca lu guió'j. Cate' bötaj yegu gubó'o, guchó'öna cuita yu'u na', pero biti' guca uquínna'j le, tu' nulibi ga naca lu guió'j. ⁴⁹ Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchó'öna yegu gubó'o cuita yu'u na', la' biguínna'jtë, ate' gubixi dërö zö'ö que.

Jesús ruúnë'-bi' bi'i huen dxin queë' tu bönni' unná bë'

(Mt. 8:5-13)

7 ¹ Cate' Jesús budxi bé'lenë' légaquië' didza' ni, guyázië' yödzö Capernaum. ² Lu yödzö ni' zoë' tu bönni' Roma rinná bé'enë'

bönni' rōjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsöjóta'yugaquië' lahuë' Lë' guídë' uduhuénë'-bi' bi'i huen dxin queë' na' ré'ebi'. ⁴ Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú lādxi'gaquië', ta'nnë':

—Náquië' lesaca' bönni' na' gunu' queë' lë ni, ⁵ tu' runë' bal bönachi uládz queëru', en benë' tu yu'u queëru' ga rudúbiru' rusédaru' queë' Dios.

⁶ Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzé'ë ga zë'ë Jesús, ate' tē' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa', ⁷ en biti' naca' lesaca' guída' ga zu'. Que lë ni na' biti' burúguida' guída' ga zu'. Bë'ësö didza', ate' huöacatëbi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' rōjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

⁹ Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel biti' rōjxáqui'da'-në' réajlë'ë quia' ca réajlë'ë quia' bönni' ni.

¹⁰ Cate' bulu'dxinë' bönni' na' gusól-lë'ë bönni' rinná bé'enë' bönni' rōjáquië' gudil-la, gula'yázië' ga naca lu yu'u lidxë', en bila'lé'enë' chiböacabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

¹¹ Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zían. ¹² Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati.

Söjcáchi'gaquië'-bi'. Bi'i nati na' nácabi' la's dui bi'i queënu tu nigula uzébido'. Zían bönachi uladza queënu nigula uzëbi na' sōjácalen-nu.

¹³ Cate' Xanru' bilé'enë'-nu, buéchi' lādxië'-nu, ate' gudxë'-nu:

—Bíti'rö cödxu'.

¹⁴ Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', li' rea', guyasa.

¹⁵ Ní'irö bubanbi'. Guró'öbi' bi'i na' zí'alö nátibi', ate' gusí lobi' ruí'ibi' didza'. Jesús budödë'-bi' lu ná'anu xiná'abi'. ¹⁶ Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queéru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzo luyú Judea, en yúgu'të yödzo idú gásibi'ilö.

Le rinabë' Juan, bönni' buquilë' bönachi nisa

(Mt. 11:2-19)

¹⁸ Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, ¹⁹ ate' gusól-lë'ë légaquië' ga na' zoë' Jesús para ila'nábinë' Lë', ila'nnë': “¿Nacu' Li' Cristo, bönni' ral-la' guídë', o naru' ral-la' cöztu'-në' bönni' yúbölö?” ²⁰ Cate' bila'dxinë' bönni' na' nasól-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasól-lë'ë netu' para inábitu' Li', innatu': “¿Nacu' Li' Cristo, bönni' na' ral-la' guídë', o naru' ral-la' cöztu'-në' bönni' yúbölö?”

²¹ La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chul-la busaljë' guió'j lógaquië'. ²² Bubi'ë didza' Jesús, rë' chopë' bönni' na' nasól-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyónili'. Tu'lé'enë' bönni' guchul-la lógaquië'. Tu'zë'ë bönni' gulatsjë'. Nuhuöácagaquië' bönni' güi'iguequinë' huë' nudzu' ruzödi. Tu'yönnë' bönni' gula'códzuë'. Nubángaqüië' bönni' gulátië'. Ta'yönnë' bönni' yechi' didza' dxi'a. ²³ Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusól-lë'ë Juan bulu'zë'ë ni', gusí lahuë' Jesús rulu'í'inë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácugaca lari' nazáca'de'e, en tu'z'í xibé yöl-la' tsahui', nacuá' lídxigaquië' bönni' ta'nná bë'ë. ²⁶ ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Öñ, rea' libí'ili', ate' nayépisëtërë' ca nu ru'í'i didza' uláz queë' Dios. ²⁷ Náquië' Juan bönni' na' nazúaj lu guichi lá'ayi ca naca queë', rna:

Buyútsöca', risól-la'a-në' gubáz quia', inóruë' ca Li'.

Bönni' ni uchi'ë nöza ga tödu'.

²⁸ 'Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilë' bönachi nisa, pero nu nácatërö cuídi'sö ga rinná bë'ë Dios nayépisëtërö ca Juan na'.

²⁹ Cate' bönachi ni', en bönni' tu'quizxjè' lázagaca bönachi bila'yönnè' didza' ni bè'è Juan, guléquibe'enè' le naca tsahui' lahuè' Dios, en bila'dilè' nisa lu në'è Juan, ³⁰ pero yugu' bönni' yudo' fariseo, en bönni' yudo' tu'sédinè' xibá queè' Moisés biti' bila'dilè' nisa lu në'è Juan, ate' caní guca, bulu'cá'anè' cá'asö le gú'unnè' Dios gunè' quégaquiè'.

³¹ Gunné' ca' Xanru':

—¿Nacxi uséqui'tseda' bönachi nacué' dza ni zóaru' na'a? ¿Nacxi caz nácagaquiè'? ³² Nácagaquiè' ca bí'ido' ta'guítjabi'. Ta'bó'öbi' lu yé'ëyi, en ta'bódx'i'abi'. Ta'nnabi' tubi' ia'tubi': “Rucódxitu' queéli' gui, pero biti' ruyá'ali'. Rul-la yéchi'tu', pero biti' ribódxili'.” ³³ Caní nácali' tu' bidè' Juan, bönni' buquilè' bönachi nisa, en biti' gudahuè' yöta xtila, en biti' gu'è xisi uva, ate' rnnali' queè': “Tu' xihui' dzaga lè'.” ³⁴ Cate' bida' neda', Bönni' Guljè' Bönachi, en rè'aj rahua', rnnali' quia': “Bönni' ni náquiè' bönni' huágulè'è, en bönni' re'jè'. Náquiè' luzá'agaquiè' bönni' tu'quizxjè', en ia'zícá'rè' bönni' dul-la'.” ³⁵ Rea' libí'ili': Naca bè' nupa nápagaca yöl-la' réajni'i queè' Dios ni'a que le túngaca.

Le benè' Jesús lidxè' tu bönni' yudo' fariseo

³⁶ Tu bönni' yudo' fariseo bulidzè' Jesús gágulenè' lè' tsözxón, ate' guyáziè' Jesús lidxè' bönni' na', en gurö'è rahuè'. ³⁷ Zóanu lu yödzö na' tu nigula udá dzaga, en cate' nózinu rö'è rahuè' Jesús lidxè' bönni' yudo' fariseo na', ní'irö bidxinnu ni' nuá'anu tu bóga'do' néquini guiój nazaca' le yudzu tu le rilá' zxixi. ³⁸ Cate' bidxinnu zaca' cúdzu'lè' Jesús, guró'önu xini'è ribódxinu. Ní'irö gusí lonu rigú'unu nisa ribódxinu ni'è Jesús, en ruzxinu ni'è len guitsa' ícjanu. Butsaga lonu ni'è, en gulú'unu ni'è lè na' rilá' zxixi. ³⁹ Cate' bönni' yudo' fariseo na' nulidzè' Jesús bilé'enè' lè ni, guzá' ládxè'è, rnnè': “La'tu' náquiè' bönni' ni bönni' ru'è didza' uláz queè' Dios, huéquibe'enè' nuzxi na', en nacxi nácanu nigula ni rigannu Lè', tu' nácanu nigula udá dzaga.” ⁴⁰ Ní'irö Jesús gudxè' bönni' fariseo na', rnnè':

—Simón, dè tu le ral-la' guía' li'.

Bubi'è didza' bönni' na', rnnè':

—Gunná, Bönni' Usedi.

⁴¹ Jesús rè' lè':

—Zoè' tu bönni' dè dumí queè', ate' nacu'è chopè' bönni' tál-lè'è dumí queè'. Tuè' bönni' na' ral-lè'è queè' lazxjè' que chopa iz, ate' ia'túè' na' ral-lè'è queè' lazxjè' que chopa beo'. ⁴² Tu' cabí dè quégaquiè' dumí ulu'guízxjè' lè na' tál-lè'è queè', que lè ni na' buniti lahuè' iropè' lè na' tál-lè'è queè'. Gunnátsöca' na'a. ¿Núzxilè' bönni' chopè' ni idxí'irönè' bönni' na' buniti lahuè' légaquiè'?

⁴³ Bubi'è didza' Simón na', rnnè':

—Réquida' neda', bönni' na' rála'rè' queè' dumí, lè na' buniti lahuè'. Jesús gudxè' lè':

—Le nácasö rnno'.

⁴⁴ Ní'irö buécjě' Jesús, ate' ni' ruyúë'-nu nigula na', rě' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quíbidá' ni'a, pero nigula ni gulú'unu ni'a nisa ribódxinu, en buzzinu ni'a len guitsa' ícjanu. ⁴⁵ Biti' butsaga lo' neda', pero cate' bidxíntea' lidxu', biti' ruzóá dxinu nigula ni, rutsaga lonu ni'a. ⁴⁶ Biti' gulú'u icja' le za, pero nigula ni gulú'unu ni'a lě na' rilá' zxxixi. ⁴⁷ Que lě ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

⁴⁸ Ní'irö Jesús gudxě'-nu nigula na', rnně':

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bó'leně' Jesús tahuë' gula'sí lógaquië' tē' luzá'agaquië', ta'nně':

—¿Nuzxi caz bönni' ni, runiti lotsě' ca' dul-la'?

⁵⁰ Ní'irö Jesús gudxě'-nu nigula na', rnně':

—Tu' réajlě'u neda', chibuló' li'. Böaj lidxu', zoa dxi lădxu'u.

Yugu' nigula tácalennu Jesús, ta'gú'unu le tahuë'

8 ¹ Gudödi gulaca lě ni, gudé' Jesús gapa nacuá' zían yödzö zxon, en yugu' yódzödo', ate' beně' libán ni', en bē'ē didza' que didza' dxi'a ca rinná bē'ē Dios, ate' idxínnutē' bönni' usēda queē' dzágagaquië' Lě'. ² Bál-lanu nigula buně' Jesús légacanu dzágagacanu ca' Lě'. Bubéajě' bō' xihui' yú'ugaca légacanu, en bugúë' yugu' yödzöhué' güí'iguequinu. Nútsa'nu lădjagacanu María, lěnu ca' Magdalena, nigula na' bubéajě' gadxi bō' xihui' yú'ugaca lěnu. ³ Juana, nigula queē' Chuza, bönni' yu'u lu nē'ē le dē lidxě' Herodes, nútsa'nu ca' lădjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrōnu ca', le tahuë' Jesús, en yugu' bönni' usēda queē'. Tu'nódzjanu le dē quégacanu.

Rucúdzu'ē didza' Jesús ca naca queē' bönni' guz

(Mt. 13:1-9; Mr. 4:1-9)

⁴ Bila'ruáj bōnachi zían yugu' yödzö ni', en bilá'gaca ga na' zoē' Jesús. Cate' bulu'dubě' ga na' zoē', Lě' bucúdzu'ē didza', rě' légaquië':

⁵ —Birúajě' bönni' guz, sōjěsiē' xisedo'. Cate' ni' sōjěsiē', bulu'huōxaj bal-la xisedo' na' ga naca la' nōza, ate' bulu'libi bōnachi léguequi. Bila'dxinba' ca' biguínido', en gulé'ajba' xisedo' na' dzö'ö la' nōza.

⁶ Bulu'huōxaj ia'bal-la xisedo' na' lu yu ga rō'ö guiōj. Cate' gula'lén xisedo' na', la' gula'bídxitē tu' cabí nalupa' yu na'. ⁷ Bulu'huōxaj ia'bal-la xisedo' na' ga bulu'lén lubá yōtsi'. Tsözxón gula'zxón lubá yōtsi' na', en xisedo' na', ate' lubá yōtsi' na' bila'rōli xisedo' na' gula'lén, en gulún ditaj léguequi. ⁸ Bulu'huōxaj ia'bal-la xisedo' na' ga naca luyú bēbu.

Cate' chigula'zxón, bulu'nödzej. Tu dxigu' na' bunödzej ia'tú gayuá'tërö xisedo' ca'.

Cate' budxi gunné' caní Jesús, bë'ë zidzej didza', rnnë':
—iNu zoa nagui, en riyöni ral-la' uzé nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nnë':
—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zica'rö bönachi ni, ruí'ilená' léguequi didza' le rucúdzu'a didza' para cate' ulu'yüë', biti' ila'lé'enë', en cate' ila'yönnë', biti' ila'yéajni'inë'.

Rigúxjö'ë Jesús le ruluí'i le bucúdzu'ë didza'

(Mt. 13:18-23; Mr. 4:13-20)

¹¹ Gunnë' ca' Jesús:

—Caní naca le ruluí'i lë na' bucúdzu'a didza'. Xisedo' na' naca xtídzë'ë Dios. ¹² Xisedo' na' bulu'huöxaj la' nöza tu'luí'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lé'.

¹³ Xisedo' na' bulu'huöxaj lu yu ga rë'ö guió'j tu'luí'i ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' biti' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huóatë ládxi'gaquië'. ¹⁴ Xisedo' na' bulu'huöxaj ga bulu'lén lubá yötsi' tu'luí'i ca raca quégaquië' bönni' ta'yönnë' didza' na', en cate' chibila'yönnë', yugu' le tuí'i ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' biti' run dxin didza' na' lu icja ládxi'do'gaquië'.

¹⁵ Xisedo' na' bulu'huöxaj ga naca luyú bëbu tu'luí'i ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxí' tunë' ca rnna didza' na'.

Rucúdzu'ë didza' Jesús que le rigú'u bení' lídxiru'

(Mt. 4:21-25)

¹⁶ Gunnë' ca' Jesús:

—Cuntu nu bönni' ruquéle'ë guí', ate' la' rudúsi'të' le guí'ina, en biti' rigü'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. ¹⁷ Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

¹⁸ 'Que lë ni na', buli'zé nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero

bönni' biti' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xiné'ë Jesús, en yugu' bönni' bóchë'ë

(Mt. 12:46-50; Mr. 3:31-35)

¹⁹ Ní'irö bila'dxinë' xiné'ë Jesús, en yugu' bönni' bóchë'ë ga na' zoë', pero biti' guca ila'bíguë'ë gala' ga zoë' tu' nacué' bönachi zían ni'. ²⁰ Zoa ni' nu bulidza Jesús, rnna:

—Nacu'ë xinó'o, en yugu' bönni' bóchu'u lö'a. Té'ënnë' iluí'ilenë' Li' didza'.

²¹ Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxië' bö' budunu'

(Mt. 8:23-27; Mr. 4:35-41)

²² Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udóditsöca'ru' ia'tsölá'a nísado' ni.

Ní'irö sôjácate'. ²³ Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxa nisa, en zoa bönadxi quégaquië'. ²⁴ Ní'irö gula'biguë'ë ga dë' Jesús, en bulu'subanë' Lë', ta'nnë':

—iBönni' Usedi! iBönni' Usedi! iChirequi huótjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en guró'ö dxi lu nísado' na'.

²⁵ Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'bánninë'. Gulé luzá'agaquië' tuë' ia'tué':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

²⁶ Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dódilö ga dë luyú Galilea. ²⁷ Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxa bulóaj ga nádjagaca yeru ba. ²⁸ Cate' bönni' na' yu'u bö' xihui' lë' bilé'enë' Jesús, guródxí'ë zidzaj, ate' buzóa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayépisëtërë'? Ráta'yua' lo' cabí usaca' zi'u neda'.

²⁹ Caní gunné' tu' chigunná bé'enë' Jesús bö' xihui' na' urúaj lu bönni' na'. Zián luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'ë lë' du guíë, en bulu'xéjanë' bregui' guíë ni'a në'ë, pero blë'ë yugu' du guíë na', ate' bö' xihui' na' yu'u lë' guchë' lë' lu lataj cá'asö. ³⁰ Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. ³¹ Ní'irö yugu' bö' xihui' na' guláta'yugaca lahuë' Jesús cabí isól-lë'ë léguequi lataj chul-la quégaca nupa nátigaca. ³² Nacuá'aba' ca' tu có'öba' cuchi zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchi zián na'. Jesús bë'ë léguequi lataj.

³³ Bulu'rúaj yugu' bö' xihui' lu bönni' na', en yöjtsú'ugaca cuchi zián na', ate' yöjácaba' cuchi zián na' ga naca tu lë'e guíój. Yöjbíxigacaba' lu nísado', ate' ni' gula'yépiba' nisa, gulátiba'.

³⁴ Cate' bila'lé'enë' bönni' tu'yúgaquië'-ba' cuchi zián na' ca na' guca quégacaba', guladxi gula'dzóbinë'. Bulu'zxúnnajë' ni', ate' yöjhuójgaquië' yöjtíxjöi'iguequinë' nupa nacuá' yödzö na', en nupa nacuá' la' guixi' ni'. ³⁵ Ní'irö bila'rúajë' bönni' yödzö na', yöjyúgaquië' lë' na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácuë' lari', en dxí'ado' chizöë', ate' guládxinë'. ³⁶ Nupa na' bila'lé'e lë' na' guca gula'guíxjöi'i légaquië' ca guca, böáquië' bönni' na' gula'yú'u bö' xihui' lë'. ³⁷ Ní'irö yúgu'të bönachi zián na' quégaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuójë'. ³⁸ Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsözxón. Gunná bé'enë' Jesús lë' ugá'anë' ni', rnnë':

³⁹ —Böaj lidxu'. Yöjtíxjöi'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

Jesús ruúnë'-bi' bi'i nigula queë' Jairo enca'

nigula na' gudannu lari' nácuë'

(Mt. 9:18-26; Mr. 5:21-43)

⁴⁰ Cate' budxinë' Jesús ia'tsölá'a nísado' na', bulu'dzeja bönachi zián nacuá' ni' ni'a queë' Lë', tu' ta'böza Lë'. ⁴¹ Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'.

⁴² Caní benë' tu' zóabi' tubi' bi'i nigula queë', chirequi gátibi'. Nácabi'

bi'i la's dui queë', en yú'ubi' ca chinnu iz. Tsanni ni' sa'yéajè' Jesús, sönógaca tu'quirö bönachi zían Lè'.

⁴³ Nútsa'nu tu nigula ladaj bönachi zían na', chiguca chinnu iz riguí'i rizáca'nu. Biti' ruhuí'i rön queénu que hué' quégaca cázanu nigula, ate' chibutönu dëra le dë queénu, riguízxjanu nupa tu'ún bönachi, pero biti' guca nu bönni' únë'-nu. ⁴⁴ Gubíga'nu zaca' cúdzu'lè' Jesús, en gudannu ruí'i lari' nácuë', ate' la' buí'tè hué' rön queénu.

⁴⁵ Ní'irö Jesús gunábinë' nupa nacuá' ni', rnnë':

—¿Nuzxi na' gudán neda'?

Gula'dá'bagui'ë yúgu'tè'. Ní'irö Pedro, en nupa nacuá'len lè' gulé' Lè', ta'nnë':

—Bönni' Usedi, nacuá' bönachi zían ni, tu'quirö Li', en tu'dxiga' Li', ate' ¿rnnatso': "¿Nuzxi na' gudán neda'?"

⁴⁶ Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjöi'inu Lè' lógaca bönachi zían na' bizx que na' gudannu lari' nácuë', en ca na' guca, la' böácatënu.

⁴⁸ Ní'irö Jesús gudxë'-nu:

—Nigúlado', tu' réajlè'u neda' chiböacu'. Böaj lidxu', zoa dxi ládxu'u.

⁴⁹ Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upíxjanu'-në' Bönni' Usedi.

⁵⁰ Cate' biyönnë' Jesús lè ni, bubi'ë didza', rë' bönni' lo na':

—Biti' gádxinu'. Guyéajlè'ësö Dios. Huöácabi' bi'i nigúlado' quiu'.

⁵¹ Cate' guyázië' Jesús yu'u na', biti' bë'ë lataj nu tsázalen Lè', pero légacasë' Pedro, en Jacobo, en Juan, enca' xuz xiná'abi' nigúlado' na'.

⁵² Ta'bödxi nupa nacuá' ni'. Ta'bödxi yeché'ë ni'a queébi' bi'i nigúlado' na', ate' Jesús rë' légaquië', rnnë':

—Bítirö códxili'. Biti' nátibi' nigúlado' ni. Rásisibi'.

⁵³ Bulu'titjè' Lè' tu' nözguequinë' chinátibi'. ⁵⁴ Ní'irö gudélè'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'. ⁵⁶ Bulu'bánninë' xuz xiná'abi', pero Jesús gunná bé'enë' légaquië' cuntú nu ilé' ca na' guca.

Risól-lè'ë Jesús bönni' usëda queë' tsöjéngaquië' libán

(Mt. 10:5-15; Mr. 6:7-13)

9 ¹ Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö'

xihui' yú'ugaca bönachi, en ulu'únë' nupa te'e. ² Gusól-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e.

³ Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en biti' ixóa yenli' chopa lari'. ⁴ Bítitës yu'u ga tsú'uli', guli'sóa ni' cate' uzá'aröli' yödzö na'. ⁵ Gátitës ga biti' ilún bönachi libí'ili' bal, buli'rúaj yödzö na', en guli'cuíbi bëchtö da' lë'e lábali', le ulu'í' légaquië' nagá'ana xíguia' nabága'gaquië'.

⁶ Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

Ca gútië' Juan, bönni' buquilë' bönachi nisa

(Mt. 14:1-12; Mr. 6:14-29)

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulé'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunné':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

¹⁰ Cate' bulu'dxinë' bönni' gubáz nasól-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guché'ë Jesús légaquië' quez. Yöjáquië' tu lataj cá'asö lu xiyú yödzö Betsaida. ¹¹ Cate' chinóziguequi bönachi lë ni, yöjnóguequi Lë', ate' Jesús benë' léguequi bal, en bé'lenë' léguequi didza' ca rinná bë'ë Dios, ate' bunë' nupa te'e.

¹² Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busól-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

¹³ Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dē, en chópasöba' böla dēba' queé'tu', o ¿naru' huayéajtsatu' tsöj'ö'öutu' le ilágugaca bönachi zían ni?

¹⁴ Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

¹⁵ Caní gulunë', ate' gula'bö'ë yúgu'të'. ¹⁶ Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzxuzxjë' léguequi, en bē'ë quégaquië' bönni' usëda queë' para ulu'cu'ë lógaca bönachi na'. ¹⁷ Gulahuë' yúgu'të', en bulu'huóljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

¹⁸ Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹ Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰ Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasól-lë'ë Dios.

Riguíxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹ Ní'irö Jesús gúdxidë'ë légaquië', en gunná bé'enë' légaquië' cuntu nu ilé' Nu náquië' Lë'. ²² Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bē', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³ Gudxë' ca' yúgu'të':

—Channö ré'enë' nu bönni' tē'ë neda', ral-la' uzóë' tsölá'alö le dē queë', en gáquië' ca tu bönni' sa'yéajë' söjtë'ë lē'e yaga cruz, ate' ní'irö gaca tē'ë neda'. ²⁴ Núti'tës bönni' ruí'i ládxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dē'ë neda', bönni' ni gata' yöl-la' na'bán idú queë'. ²⁵ Biti' bi uzi'ë xibé tu bönni' channö utubë' queë' yúgu'të le dē yödzölió ni, pero unítië' tsaz yöl-la'

na'bán queë'. ²⁶ Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljè' Bönachi, utuí'ida' bönni' na' cate' huöda' idinná bè'a, dzágagaca neda' yöl-la' zxön queë' Xuza', en yöl-la' zxön quégaquië' gubáz lá'ayi queë' Dios. ²⁷ Le nácatè rea' libí'ili', nacuá' bal-lè' bönni' ni biti' ilátië' cate' ila'lé'erönë' dza idinná bè'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸ Cate' bizá'a xunu' gubidza gudödi bè'ë Jesús yugu' didza' ni, ní'irö guché'ë Pedro, en Juan, en Jacobo, ate' gurenë' tu lu guí'ado', ga na' bulidzè' Dios. ²⁹ Tsanni ni' ruí'ilenë' Dios didza', bidzá' ca riná' lahuë', ate' böáca chiguíchido'os lari' nácuë', en guyëpi yösa bení'. ³⁰ Ní'irö bulu'luí'i lógaquië' chopè' bönni' ga zoë' Lè' tuí'ilenë' Lè' didza'. Nácagaquië' Moisés, en Elías. ³¹ Chopè' ni gula'yëpè' yösa bení', ate' tuí'ilenë' Jesús didza' ca si' uzé'ë yödzölió ni, gátië' lu yödzö Jerusalén. ³² Sal-la' chirácada' ilásië' Pedro, en nupa nacuá'len lè', bayudxi gula'ná'sè', ate' bila'lé'enë' yöl-la' bení' queë' Jesús, en chopè' na' nacuá'lenë' Lè'. ³³ Cate' bulu'zé'ë chopè' na' ga na' zoë' Jesús, ní'irö Pedro gudxè' Lè':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'. ³⁴ Tsanni ni' ru'ë didza' ni, la' guró'otè böaj le bugacu légaquië', ate' guládxinë' tu' nacu'ë lu böaj na'. ³⁵ Ní'irö biyón chi'i Nu ruí'i didza' lu böaj na', rnna:

—Bönni' ni náquië' Zxí'ina'. Nadxí'ida' Lè'. Buli'zé' nágali' didza' gu'ë.

³⁶ Cate' budxi bè' didza' chi'i na', tuzè' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulé' ca naca le bila'lé'enë'.

Ruúnë' Jesús bi'i bönni' yu'u bö' xihui' lëbi'

(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjè' Jesús, en bönni' na' dzágagaquië' Lè' lu guí'ado' na', ate' bila'rúaj bönachi zían dutságagaca Jesús. ³⁸ Ní'irö bè'ë zidzaj didza' tu bönni' nútsë'ë ladaj bönachi zían na'. Bulidzè' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lëbi' le run ga ribódx'i'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajè' le, pero biti' gula'zéqui'në'.

⁴¹ Bubi'ë didza' Jesús, rnnë':

—Libí'ili', biti' réajlè'ëli', en nachixi ícjali'. ¿Gáca'xte ral-la' sóalena' libí'ili', en guá' ilena' queé'li'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Guli'cú'u icja nágalí' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero bití' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo. ⁴⁷ Réquibe'enë' Jesús le ta'zá' ládxi'gaquië', ate' gudélë'ë-bi' tubi' bí'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ladjali' nácarë' nōxaj ladxi', bönni' ni náquië' lo.

Nu bití' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu bití' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén. ⁵² Gusól-lë'ë yugu' bönni' gubáz queë' ila'nóruë' ca Lë', ate' yōjáquië' tu yōdzōdo' quégaca bönachi Samaria para tsōjpá'agaquië' ga ugá'anë' Jesús tu yëla. ⁵³ Yugu' bönni' yōdzō na' bití' gulunë' Jesús bal tu' chinaca queë' sa'yéajë' Jerusalén. ⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, tē' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjè' Jesús, en gudil-lè' légaquiè', rnnè':
 —Biti' nózili' bizxi bö' dzágui libí'ili'. ⁵⁶ Bida' ni neda', Bönni' Guljè' Bönachi, calëga para usunítia' yöl-la' na'bán quégaca bönachi, pero bida' dusölá' bönachi.
 Ní'irö yöjáquiè' yödzö yúbölö.

Nupa té'ëni tsöjácálen Jesús

(Mt. 8:19-22)

⁵⁷ Tsanni ni' yú'ugaquiè' nöza Jesús, en yugu' bönni' dá'gaquiè' Lè', bidxinè' tu bönni' yödzö Jerusalén, en rë' Jesús:

—Xan, ré'ënda' sá'lëna' Li' gáti'tës ga tseju'.

⁵⁸ Jesús rë' lè':

—Yúgu' böza', nacuá' zxa bulóaj quégacaba', ate' biguínido', dxíagaca xcá'agacaba', pero neda', Bönni' Guljè' Bönachi, biti' dë quia' ga gáta'a uzí' ládxa'a.

⁵⁹ Ní'irö Jesús gudxè' tu bönni' yúbölö, rnnè':

—Gudá' neda'.

Bönni' ni gudxè' Lè':

—Xan, benna neda' lataj huöja' lidxa' ga idxinrö dza chibucácha'a-në' xuzá'.

⁶⁰ Jesús gudxè' lè':

—Bë' lataj bönni' chizóa ilátiè' ulu'cáché'ë nupa chinati quégaquiè', pero li', guyéaj, yójén libán ca inná bë'ë Dios.

⁶¹ Ní'irö bidxinè' ia'tué' ca', en rë' Jesús:

—Xan, ré'ënda' sá'lëna' Li', pero benna neda' lataj tseja' tsöjzégacada'-në' didza' di'a dza quia'.

⁶² Jesús gudxè' lè':

—Núti'tës bönni' ruí'i ládxe'ë le raca yödzölió náquiè' ca tu bönni' rugá'anë'-ba' bëdxi, en ruyúè' zaca' cúde'ülè'. Nu run caní biti' naca lesaca' tsaza ga rinná bë'ë Dios.

Risól-lè'ë Jesús tsónnalalaj yu' chiè' bönni' tsöjégaquiè' libán

10 ¹ Gudödi gulaca yugu' lè ni, guróè' Xanru' ia'tsónnalalaj yu' chiè' bönni' usëda queè', ate' gusól-lè'ë légaquiè' chopa huéajgaquiè' para ila'nóruè' ca Lè', en tsöjáquiè' yúgu'të yödzö, en yódzödo' gapa chizóa tödè' Lè'. ² Gudxè' légaquiè':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacuá'. Que lè ni na', guli'gáta'yu lahuè' Dios, náquiè' Xan la' yëla na', isól-lè'ë yugu' huen dxin ga naca la' yëla queè'. ³ Guli'tséaj na'a. Buli'yútsöca', neda' risól-la'a libí'ili', nácali' ca yugu' bö'cu' zxila' söjácaba' ladjagacaba' bö'cu' guí'a sínia'. ⁴ Biti' guá'ali' yöxaj dumí, en calëga buzudi yöta, en biti' guá'ali' ia'tú cö' xiráchuli', en biti' tseli' para güí'ilenli' bönachi didza'

gapa naca la' nōza. ⁵ Gátit'tës yu'u ga tsú'uli', innali': "Le ribequi dxi ladxi' gaca quégaca bönachi nacuá' yu'u ni." ⁶ Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'. ⁷ Guli'gá'ana yu'u ga na' tsú'uli', en guli'guí'aj guli'gagu bi ilunnë' queéli', tu' udzöli quézinë' bönni' huen dxin le gahué'. Biti' tódili' yu'u yu'u. ⁸ Gátit'tës yödzö ga tsú'uli', ate' ilún libí'ili' bal, guli'gagu le ulu'cu'ë loli'. ⁹ Buli'ún nupa te'e nacuá' yödzö na', en guli'guí'ë léguequi: "Chibidxín le rinná bë'ë Dios ga zóali'." ¹⁰ Gátit'tës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nōza que yödzö na', en innali': ¹¹ "Bëchtö que ládza'li' le da lë'e lábatu' ruquínajtu', le ruluí'i nabága'li' xíguia', pero ral-la' inózili' lë ni, chibidxín le rinná bë'ë Dios ga zóali'." ¹² Neda' rea' libí'ili', cate' idxín dza ichúguië' Dios quégaca bönachi, ila'guí'i ila'zaca'rö bönachi yödzö ni' ca ila'guí'i ila'zaca' bönachi yödzö Sodoma, nupa ni' busunítië' Dios.

Le gaca quégaca nupa biti' ulu'bí'i ládxi'gaca
(Mt. 11:20-24)

¹³ Gunné' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxi'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'igaca chibulu'bí'i ládxi'gaquië'. ¹⁴ Que lë ni na', cate' idxín dza ichúguië' Dios quégaca bönachi, quí'i sáca'röli' ca ila'guí'i ila'záquië' bönni' yödz Tiro, en yödz Sidón. ¹⁵ Libí'ili', bönachi Capernaum. Réquili' tsázali' yehua' yubá. Huó'tjali' tsöjtsázali' lataj chul-la quégaca nupa nátigaca.

¹⁶ Ní'irö Jesús gudxë' yugu' bönni' usëda queë', rnnë':

—Nu ruzé nagui libí'ili', ruzé nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasól-lë'ë neda'.

Bönni' yöjéngaquië' libán tu'dxinë' ga zoë' Jesús

¹⁷ Cate' tsónnalalaj yu' chië' bönni' na' gusól-lë'ë Jesús bulu'dxinë' ga zoë' Lë', bönni' na' yöjéngaquië' libán, ta'nné':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxa' lúzxiba ca run yösa, le riyaza luyú. ¹⁹ Buli'yútsöca', neda' nudöda' lu ná'ali' yöl-la' unná bë' para gaca sōngacali'-ba' bëla sínia', en xöjnó', en biti' bi gaca queéli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a.

²⁰ Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero bulu'iguequinu'-bi' bí'ido' ca naca. iCa' gaca, Xuza', tu' caní guyaza ládxu'u!

²² Ní'irö gunné':

—Yúgu'të budödë' Xuza' lu na'a. Cuntu nu bönni' nózinë' Nu náquië' Zxí'inë' Dios, pero tuzë' Dios Xuz nózinë', ate' cuntu nu nözi Nu náquië' Dios Xuz, pero tuzë' Zxí'inë' nózinë', ate' inózigaca ca' nupa na' Zxí'inë' ré'ënë' uluí'inë' léguequi Xuzë'.

²³ Ní'irö Jesús buyüë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili', ²⁴ tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero biti' bila'lé'enë' le. Gulé'ënnë' ila'yönnë' le riyónili', pero biti' bila'yönnë' le.

Tu bönni' Samaria, bönni' tsahui'

²⁵ Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

²⁷ Bubi'ë didza' bönni' na', rnnë':

—Caní rnna: “Idxí'inu' Xanu' Dios idú ládxu'u, en len idú icja ládxido'o, en len idú yöl-la' run quiu', en len idú yöl-la' réajni'i quiu', ate' idxí'inu' bönni' luzó'o ca nadxí'i cuinu'.”

²⁸ Jesús rë' lë':

—Dxí'ado' bubi'u didza'. Ben caní, ate' gata' quiu' yöl-la' na'bán na'.

²⁹ Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

³⁰ Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'gúë' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'. ³¹ Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'. ³² Gudödë' ca' ni' tu bönni' nababë' zxí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'.

³³ Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxë'ë lë'. ³⁴ Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchólinë' le lari'. Ní'irö budxië' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. ³⁵ Cate' za' rení' ia'tú dza, en chizóa uzé'ë bönni' Samaria na', guléajë' lázxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda'." ³⁶ Na'a, ¿nacxi runi li'? ¿Núzxilë' bönni' yonna ni gúquië' bönni' luzé'ë bönni' na' gulu'ë dö' bönni' gubán queë'?

³⁷ Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

³⁸ Ní'irö bu'ë nöza Jesús, ate' bidxinë' tu yódzödo' ga ni' tu nigula lënu Marta guché'ënu Lë' lídxinu. ³⁹ Marta ni zóanu nigula zxílanu lënu María, ate' María na' guró'ötënu ga naca xini'ë Jesús, en ruzé' náganu xtídzë'ë. ⁴⁰ Marta na' bubi buguí'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxi'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zían le ruí'i ládxu'u runu'.

⁴² Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' biti' udúa queébi'.

Ca ral-la' ulídzaru'-në' Dios

(Mt. 6:9-15; 7:7-11)

11 ¹ Tu dza ni' Jesús rulidzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios güí'ilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios güí'ilenli'-në' didza', guli'ná:

Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxu'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'

ca netu' ca' runiti lotu' nupa tua' dö' queétu'.

Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ladjali', en zoë' böchi' luzé'ë, en channö huidë' ga na' zoë' guluhuëla, ate' ulidzë' lë', inné': "Bócha'a, benna quia' tsonna yöta xtila ⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'." ⁷ ¿Naru' ubi'ë didza' caní bönni' na' zoë' yu'u, guíë' lë': "Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'?" ⁸ Neda' rea' libí'ili': Sal-la' biti' chasë' bi unödzjë' queë' tu' náquië' böchi' luzé'ë, pero chasë', en unödzjë' queë' idutë le riquinnë' para cabirö upízxjanë' lë'. ⁹ Que lë ni na' rea' libí'ili': Guli'naba, ate' Dios gunnë' queéli'. Guli'quilaj, ate' idzöli queéli'. Buli'lidza ra' yu'u, ate' tsalaj queéli'. ¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoë' nu bönni' ladjali', en náquië' xuz, ate' channö zxí'inë' inábibi' lë' yöta xtila, ¿naru' unödzjatsë' queébi' guiój? Channö inábibi' lë' tuba' böla, ¿naru' unödzjatsë' queébi' bëla? ¹² Channö inábibi' lë' dxita que böra, ¿naru' unödzjatsë' queébi' xöjnó'? ¹³ Caní naca, nácali' libí'ili' huiá' dö', pero nózili' unödzjali' quégacabi' zxí'inili' le naca dxi'a. Nácatërö löza Xúzili' zoë' yehua' yubá gunnë' queéli' Dios Bö' Lá'ayi, núlöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴ Tu dza bubéajë' Jesús bö' xihui' yu'u tu bönni', le run ga biti' raca inné'. Cate' burúaj bö' xihui' na', bë'ë didza' bönni' na' biti' guca inné', ate' bulu'bani bönachi nacuá' ni'. ¹⁵ Bal-la bönachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶ Ia'bal-la bönachi na' gulé'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá. ¹⁷ Réquibe'enë' Jesús le ta'zá' ladxigacuië', ate' rë' légaquië':

—Gáti'tës ga ta'nná be'e bönachi luzé'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacuá' tu yu'u, údxi quéguequi. ¹⁸ Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? ¹⁹ Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. ²⁰ Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

²¹ 'Cate' tu bönni' nál-la dē lu nē'ē le rudí'inē', en rapa chi'ē lidxē', naca chi'i dērō le dē queē'. ²² Na'a, channō zē'ē ia'túē' bönni' nál-latērē' ca lē', en ucul-lē' lē', ní'irō cuē' yúgu'tē le rudí'inē', lē na' ruzxōni ládxē'ē, ate' quísiē' le dē queē' bönni' na'.

²³ 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' rudxín xilataj

(Mt. 12:43-45)

²⁴ Gunné' ca' Jesús:

—Cate' rirúaj bö' xihui' lu bönni', ridá gapa nabídx, riguila'j ga uzí' ladxi'. Channō cabí idzōli que, inná: "Huōja' xilatja' ga ni' birúaja'."

²⁵ Cate' rudxín ni', rōjxaca' bönni' na', náquiē' ca tu yu'u chinulúa, en chinabá'a para nu tsōjsóa ni'. ²⁶ Ní'irō reaj, en rōjxí' ia'gadxi bö' xihui', nácacacatērō xihui' ca le, ate' ta'yú'u bönni' na'. Na'a, le raca queē' bönni' na' nayáli'tērō ca le guca queē' zí'alō.

Le naca bica' ba le naca idú

²⁷ Tsanni ni' ru'ē Jesús didza' ni, tu nigula nútsa'nu ladaj bōnachi zían na' bé'ēnu zidzaj didza', rnnanu:

—Bica' ba nigula na' biá'anu Li' lē'ēnu, en bica' ba ca' luchú'unu ga na' gúdxu'u.

²⁸ Bubi'ē didza' Jesús, gunné':

—Nácacacatērō bica' ba nupa ta'yōni xtídzē'ē Dios, en tun ca rnna.

Ta'nábinē' Jesús gunē' le gaca bē' nuzxi náquiē'

(Mt. 12:38-42; Mr. 8:12)

²⁹ Tsanni ni' ta'biga' bōnachi zían ga zoē' Jesús, gusí lahuē' ru'ē didza', rnnē':

—Ta'nába bōnachi tuá' dō' ni guna' le gaca bē' ga za' yōl-la' huáca quia', pero biti' bi le gaca bē' ila'lé'enē'. Tuz le gaca bē' ca na' guca queē' Jonás ila'lé'enē'. ³⁰ Ca na' guca queē' Jonás, gúquiē' tu le naca bē' lógaca bōnachi yōdzō Nínive, lēscá' caní gaca quia' neda', Bönni' Guljē' Bōnachi, gaca' tu le gaca bē' lógaca bōnachi dza ni zóaru' na'a. ³¹ Cate' idxín dza ichúguiē' Dios quégaca bōnachi ila'guí'i ila'zaca', en uchi'a usöróē' bōnachi dza ni zóaru' na'a, Dios uchisē'-nu nigula gunná bé'enu bōnachi dza ni'te luyú ni' dē tsólá'a ga ridōdi gubidza beo' ziaga, ate' le bennu uluí'i nabága'gaca bōnachi ni xíguia', tu' bídanu lēnu, birúajnu ga naca zi'tu' para uduzē' náganu didza' réajni'i bē'ē Salomón, bönni' gunná bé'enē' bōnachi Israel, pero na'a, zoa' neda' ni, en nayépisētēra' ca Salomón na'. ³² Lēscá' caní, Dios uchisē' bönni' gula'cu'ē yōdzō Nínive cate' idxín dza ichugu bē'ē quégaca bōnachi, en uchi'a usöróē' bōnachi dza ni zóaru' na'a, ate' le gulunē' uluí'i nabága'gaca bōnachi ni

xíguia', tu' bulu'bí'li ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayépisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiój loru' naca ca tu le rigú'u bení' lu icja ládxi'do'oru'. Channö guiój lo' naca dxi'a, idúteo' yudzu le naca bení', pero channö naca xihui' guiój lo', idúteo' yudzu le naca chul-la. ³⁵ Ben chi'i cuinu' na'a, para cabí huóaca chul-la lë na' rigú'u bení' lu icja ládxi'do'o.

³⁶ Caní naca, channö idúteo' nalísinu' le naca bení', en biti' bi zóalen li' le chul-la, yúgu'të ilé'enu' dxi'a ca raca cate' ruzení' quiu' guí'.

Jesús ruzégui'ë yugu' bönni' yudo' didza'

(Mt. 23:1-36; Mr. 12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. ³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libí'ili', bönni' yudo' fariseo, riguibí cuinli' ca riguíbili' láhuilögaca le ré'aji ráhuili', pero lu icja ládxi'do'oli' ruhuídi'li', en rizá' ládxi'li' le ruá' dö'. ⁴⁰ Libí'ili', bönni' biti' réajni'ili'. ¿Naru' cabí nózili', Nu ben le zoa láhuisö ben ca' le yu'u lë'elö? ⁴¹ Na'a, guli'gún gun le dë queéli', ate' ní'irö huóaca dxi'a yúgu'të le dë queéli'.

⁴² 'Bica' bayechi' libí'ili', bönni' yudo' fariseo. Riguízxjali' que yudo' tu cö' huéaj tu' chi cö' le rizí'ili' que xöhuéaj, en que guixi' ruda, en quégaca guixi' cuando', pero rudódisili' le naca tsahui', en yöl-la' nadxí'i queéli' Dios. Yugu' lë ni run bayudxi gunli', en biti' ucá'anali' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo. Ré'ënili' có'öli' gapa naca lo lu yu'u ga rudúbili' rusédali' queë' Dios, en ré'ënili' ulu'lidza bönachi libí'ili' ba zxön gapa naca láhuilöguequi bönachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' ruluí'isö tsahui' cuinli', tu' nácali' ca náagaca yeru ba quégaca nupa nátigaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

⁴⁵ Ní'irö bubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' bönachi tu yua' zi'i le cabí gaca nu guá', pero libí'ili' calëga láti'do'os biti' ruláhui'li' le len ná'ali'.

⁴⁷ 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. ⁴⁸ Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

⁴⁹ 'Que læ ni na', lu yöl-la' réajni'i queë', Dios gunné' caní: "Isól-la'a queéli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." ⁵⁰ Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bétigaca bönachi légaquië' cate' gusí lo rata' yödzölió, ⁵¹ ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bédxido' lahuë' Dios, en ga dë lataj lá'ayi. Que læ ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

⁵² 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxí'ini guíë que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinózigaca nupa té'ëni ila'yaza.

⁵³ Cate' Jesús budxi bé'lenë' légaquië' didza' ni, bönni' yudo' tu'sedinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

Rusédinë' Jesús ca naca yöl-la' ruluí'isö tsahui' cuini

12 ¹ La' dza na' bulu'dubi zían gayuá' bönachi ga zoë' Jesús ga bidxintë ta'rólisö luzé'eguequi bönachi na'. Ní'irö gusí lahuë' Jesús rë' yugu' bönni' usëda queë' cazë', rnnë':

—Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' ruluí'isö tsahui' cuini quégaquië'.

² Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'. ³ Que læ ni na', yúgu'të le chigunnáli' ga naca chul-la, ila'yöni bönachi ga naca lu bení', ate' didza' bé'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'*(Mt. 10:28-31)*⁴ Gunné' ca' Jesús:

—Bócha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi. ⁵ Uluí'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queéli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

⁶ 'Túti'gaquië'-ba' gáyu'ba' biguínido' len chopa dumí lásido'. Biti' ral-la ládxië'-ba' Dios tu biguínido' na'. ⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguínido'.

Nupa ta'nnasö néquiguequi queë' Jesús*(Mt. 10:32-33; 12:32; 10:19-20)*⁸ Gunné' ca' Jesús:

—Rea' libí'ili': Yúgu'të bönni' ta'nné' néquiguequinë' quia' neda' lógaca bönachi, lësca' neda', Bönni' Guljë' Bönachi, innía' néquiguequinë' quia' lógaquië' gubáz lá'ayi queë' Dios, ⁹ ate' bönni' ta'dá'baguë'ë néquiguequinë' quia' lógaca bönachi, lësca' neda' tá'baga'a néquiguequinë' quia' lógaquië' gubáz lá'ayi queë' Dios.

¹⁰ 'Yúgu'të nupa bi ila'nné quia' neda', Bönni' Guljë' Bönachi, gaca uniti lahuë' Dios léguequi, pero nu inné zi' queë' Dios Bö' Lá'ayi, bití' uniti lahuë' Dios nu na'.

¹¹ 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sëdë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'. ¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queéru' ga gal-la ládxi'ru'-në' Dios¹³ Tu bönni' nútsë'ë ladaj bönachi zían na' rë' Jesús, rnnë':

—Bönni' Usedi, gudxë' bócha'a gunné' uláz quia' le guta' queë' xuztu'.

¹⁴ Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queéli'?

¹⁵ Ní'irö Jesús gudxë' bönachi nacuá' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' bití' nácasö le zían le dë queë'.

¹⁶ Ní'irö Jesús bë'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runódzjada' gulapa lu xiyúë'. ¹⁷ Ní'irö guzá' ládxë'ë bönni' na', rnnë': “¿Nacxi guntsa'? Biti' dë ga gapa chi'a le rulá' quia'.” ¹⁸ Ní'irö rnnë': “Caní guna'. Uquínnaigaca' yu'u ga rapa chi'a le rulá' quia', ate' guna' yugu' yu'u zxóntërö ca', ate' gapa chi'a le rulá' quia' ni', len yugu' le dë quia'. ¹⁹ Ní'irö gaca guíë cuina': Chidéda' quia' zían le chinutuba', le gáhuida' zían iz. Uzi' ládxa'a. Guí'aj gahua', en udzējada'.” ²⁰ Ní'irö Dios rë' lë': “Li', bönni' bití' bi nózínë'. Na'a dzö' gátíu'. Na'a, ¿nuzxi caz guequi que, lë na' chinutubu'?” ²¹ Caní raca queë' bönni' rutubë' la' queéze' yöl-la' tsahui', en bití' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

²² Gudödi ni' Jesús gudxë' yugu' bönni' usëda queë', rnnë':
—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. ²³ Nácarö lesaca' yöl-la' na'bán queé'li' ca le ráguli', ate' nácarö lesaca' idú le nácali' ca lari' ráculi'. ²⁴ Buli'yutëz ca raca quégacaba' boíquiaj. Biti' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuë' légacaba'. ¿Naru' cabí nazáca'tëröli' libí'ili' ca yugu' biguínido'? ²⁵ ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu' ruúbi ruguí'i ládxi'da'ahuë'? ²⁶ Que lë ni na', channö cabí gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxóntërö?
²⁷ Buli'yutëz ca ta'zxón yöjdo'. Biti' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'. ²⁸ Channö Dios runë' lachi yöj guíxi'do' rő'gaca na'a la' guixi', ate' cuxó huidzaj ila'gu'ë léguequi lu guí', ¿naru' cabí gunë' le nácarö dxi'a queé'li', libí'ili' na' bití' réajlë'ëli' Dios idú ládxi'li'? ²⁹ Que lë ni na', bití' güí'i ládxi'li' le ral-la' gáguli', en le ral-la' guí'jali', en bití' ubi uguí'i ládxi'do'oli'. ³⁰ Yúgu'të lë ni ta'guilaj bönachi yödzölió ni, pero chinóz quézinë' Xúzili' Dios le riquínili'. ³¹ Guli'güí' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queé'li'.

Yöl-la' tsahui' rigú'uru' yehua' yubá

(Mt. 6:19-21)

³² Gunnë' ca' Jesús:
—Bití' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxe'ë Xúzili' Dios gunnë' queé'li' lataj tsú'uli' ga ni' rinná bë'ë Lë'. ³³ Guli'guti' le dë queé'li', en buli'nödzaj quégaca bönachi yechi'. Caní gaca, gunli' queé'li' yöxaj dumí le cabí gaca ditaj, en cú'uli' yöl-la' tsahui' na' yehua' yubá le bití' ubidxi udú, ga ni' bití' idxinë'

bönni' gubán, en biti' usunítiba' böa'do' le. ³⁴ Ga ni' dë yöl-la' tsahui' queéli', ni' guí'i ládxi'li' idxinli'.

Ral-la' sóaru' ban ladxi'

³⁵ Gunné' ca' Jesús:

—Guli'sóa sina', en guli'quela' guí' le uzení' queéli'. ³⁶ Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë. ³⁷ Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. ³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'. ³⁹ Lë ni ral-la' inózili'. La'tu' nózinë' xan yu'u bizxi dza huadxinë' bönni' gubán, usubán ládxi'ë, en biti' gu'ë lataj bönni' na' udxíë' yeru lidxi', para cabí cuanë' le dzö'ö lidxi'. ⁴⁰ Que lë ni na', guli'sóa ban ladxi' ca' libí'ili', tu' huöda' neda', Bönni' Guljë' Bönachi, tu dza biti' ribözali' neda'.

Bönni' huen dxin tsahui', en bönni' huen dxin biti' náquië' tsahui'

(Mt. 24:45-51)

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönachi?

⁴² Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxi' para cate' gála'rö ilahuë' bönni' nacu'ë lidxi', gu'ë que queégaquië' le ilahuë'. ⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. ⁴⁴ Le nácatë rea' libí'ili', udödë' xanë' lu në'ë bönni' huen dxin tsahui' na' idutë le dë queë'. ⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zíca'rë' huen dxin, bönni' en nigula, en isí lahuë' guí'aj gahuë', en súdxinë', ⁴⁶ ní'irö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta'yéajlë'ë.

⁴⁷ Bönni' huen dxin na' nózinë' le ré'ënë' xanë', en biti' zoë' sina', en biti' runë' ca rnnë' xanë', bönni' ni, quínitërë' xanë' lë'. ⁴⁸ Channö cabí nózinë' tu bönni' huen dxin le ré'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxi'ë lë' le zxön, le zxóntërö ca' unabë' xanë' lu në'ë bönni' huen dxin na'.

Le náquië' Jesús gun ga ila'ruáj choplö bönachi

(Mt. 10:34-36)

⁴⁹ Gunnë' ca' Jesús:

—Bida' neda' dujena' ga tsegui guí' yödzölió ni, en caba ládxa'a chinaguéla' guí' na'. ⁵⁰ Na'a, dë tu le ral-la' qui'i saca'a le naca ca tu le idílida' nisa, ate' rō'a böniga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' dulëquia' le gun ga ila'ruáj choplö bönachi. ⁵² Na'a isí lo ulu'lá'alén luzé'eguequi gayu' bönachi nacua' tu yu'u. Tsonnë' ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonnë' na'. ⁵³ Nu bönni' zóabi' bi'i bönni' queë' tá'baguë'ë zxí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu zxí'ininu na', ate' bi'i nigula na' tá'baga'bi' xiná'abi'. Nigula zóanu nigula xzoa' lídxinu tá'baga'nu xzoa' lídxinu na', ate' nigula xzoa' lídxinu na' tá'baga'nu xto' zxí'ininu.

Le nácagaca bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxë' ca' bönachi zían nacua' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guió’j”, ate' caní raca. ⁵⁵ Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca. ⁵⁶ Libí'ili', bönni' ruluí'isö tsahui' cuinli'. Nózili' le ruluí'i le raca lúzxiba, en le raca luyú ni, pero biti' réquibe'eli' le ruluí'i le nácagaca bë' taca dza ni zóaru' na'a.

Ral-la' ugá'analenu' tsahui' nu rilé rë'u

(Mt. 5:25-26)

⁵⁷ Gunnë' ca' Jesús:

—¿Bizx que biti' ruchi'a rusöröli' la' libí'isili' ca naca le naca tsahui'? ⁵⁸ Channö zoa nu bi unabi yudxi li', ate' zéajli' idxinli' yúlahui', bë' ladxi' ugá'analenu' tsahui' nu na' tsanni ni' yú'uli' nōza, para cabí uzegui li' lahuë' bönni' uchi'a usöróë' libí'ili', ate' bönni' uchi'a usöróë' na' udödë' li' lu në'ë bönni' rusayjë' lidxi guíë, ate' bönni' na' rusayjë' lidxi guíë cu'ë li' lidxi guíë na'. ⁵⁹ Rea' li', biti' uruju' ni' cate' údxirö quizxju' yúgu'të dumí lásido' ral-lu'u que nu na'.

Run bayudxi ubí'i lādxi'ru'

13 ¹ La' dza ní'isö bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quëgaquië', le bugútsi'në' xichóngacaba' böa' bëdxi chigulútië' légacaba' para ila'gu'ë xichóngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zíca'rë' bönni' Galilea, tu' gula'guí'i gula'zaquië' caní? ³ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'. ⁴ Lësca' caní guca quégaquië' chizxunë' bönni' ni', yöjbaga' yu'u sibi na' nazí'le le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zíca'rö bönachi nacuá' Jerusalén? ⁵ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

Rucúdzu'ë didza' Jesús que yaga higo biti' bi ribía

⁶ Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Røjtiljë' le ribía yaga na', pero biti' bi ridzólinë'. ⁷ Ní'irö gudxë' bönni' runë' dxin lu xiyúë' na', rnnë': “Chiguca tsonna iz rida' rududilja' le cuía yaga higo ni, en biti' bi ridzólida'. Guchugu le. ¿Bizx que run nigui luyú ni?”

⁸ Ní'irö bubi'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxi'a, pero channö cabí bi cuía, ní'irö ichugu' le.”

Ruúnë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'. ¹¹ Zóanu tu nigula ni' chiguca chizxunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en biti' ca' raca ulí cuinnu.

¹² Cate' bilé'enë'-nu Jesús, bulidzë'-nu, rnnë':

—Nígúlado', chiböácu' que yödzhué' quiu'.

¹³ Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. ¹⁴ Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵ Ní'irö bubi'ë didza' Xanru', rnnë':

—Libí'ili', bönni' ruluí'isö tsahui' cuinli', ¿naru' cabí rusédxigacali'-ba' böa' bëdxi que queéli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa? ¹⁶ Nácanu nigula ni' xzí'ini xi'sóë' Abraham, ate' idú chizxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷ Cate' bë'ë didza' ni Jesús, bulu'tuí'inë' yúgu'të bönni' nacu'ë ni' ta'lenë' Lë', pero bulu'dzeja ia'zíca'rö bönachi, yúgu'të nupa nacuá' ni', tu' ta'lé'enë' yugu' le zxön runë' Jesús.

Rucúdzu'ë didza' Jesús que xisedo' mostaza

(Mt. 13:31-32; Mr. 4:30-32)

¹⁸ Ní'irö rnnë' Jesús:

—¿Nacxi caz raca rizxón le rinná bë'ë Dios, o bizxi uséqui'tseru' le?

¹⁹ Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.**Rucúdzu'ë didza' Jesús que cúa zi que yöta xtila**

(Mt. 13:33)

²⁰ Lësca' caní rnnë' Jesús:—¿Bizxi caz uséqui'tseda' le rinná bë'ë Dios? ²¹ Naca ca cúa zi que yöta xtila, le guzxi'inu tu nigula, en bugútsi'nu tsonna cö' cúa yöta xtila, ate' guyazxaj idútë cúa na'.**Tu ga tódiru' le naca guído'**

(Mt. 7:13-14, 21-23)

²² Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yódzödo', ate' rusédinë' bönachi nacuá' gapa na'. ²³ Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacuá' ni', rnnë':

²⁴ —Guli'güi'í ládxi'li' tsú'uli' saca' ga nu ridödi le naca guído', tu' rea' libí'ili': Zían nupa ilé'ëni ila'yaza ni', pero biti' ila'zéqui'në'. ²⁵ Tödi chasë' Xan yu'u, en usayjë' yu'u, isí loli' libí'ili' na' zóali' ní'ilö ulídzali'në' ra' yu'u na', ate' guié'li'-në': “Xan, Xan, gusalaj queétu'.” Ní'irö ubi'ë didza' Lë', en guíë' libí'ili': “Biti' nözda' nuzxi libí'ili'.” ²⁶ Ní'irö isí loli' innali': “Güi'í gudágulentu' Li', ate' busédinu' gapa naca lu yé'ëyi queétu'.” ²⁷ Ní'irö guíë' libí'ili': “Rea' libí'ili', biti' nözda' gazxi bönachi libí'ili'. Guli'cuíta ga zoa', yúgu'tëli' ruá'ali' dö'.” ²⁸ Ní'irö cödxí yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'të bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilö. ²⁹ Ila'dxín bönachi ila'ruáj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios.³⁰ Ní'irö ilaca lo bal-la bönachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

Ribödxí yeché'ë Jesús ní'a quégaca bönachi Jerusalén

(Mt. 23:37-39)

³¹ La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—iBurúaj! iBuzxunnaj ni! iR'é'ënë' Herodes gútië' Li'!

³² Jesús rë' légaquië':

—Guli'tséaj, guli'tsöjödxe' bönni' na' náquië' ca tuba' böza', innali': “Buyútsöca', rubéajgaca' bö' xihui', en ruúna' bönachi na'a, en cuxó, en cate' gaca lidzaj, údxí guna' dxin quia'.” ³³ Run bayudxi tséajlensa' ca' nöza na'a, en cuxó, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

³⁴ 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxí'gacali'-në' guió'j bönni' gubáz risól-lë'ë Dios ga zóali'. Cate' xö zían luzuí gú'unida' utuba' libí'ili' quia' ca runba' yöjede, rutúbiba' bórado' queéba' zxan xíliba', pero biti' gú'unili'.

³⁵ Buli'yútsöca', cá'asö ugá'ana lídxili', ate' rea' libí'ili', bíti'rö ilé'eli' neda' cate' idxinrö dza innali': “Bica' ba Nu na' za' uláz queë' Xanru'.”

Ruúnë' Jesús tu bönni' ré'enë' huë' gui

14 ¹ Cate' naca dza lá'ayi quégaquië' bönni' judío, guyu'ë Jesús lidxë' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. ² Zoë' ca' tu bönni' ré'enë' huë' gui ga na' zoë' Jesús. ³ Ní'irö Jesús gunábinë' bönni' yudo' usedi táquië' xibá queë' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busól-la'të' lë'. ⁵ Ní'irö Jesús rë' yugu' bönni' yudo' na', rnnë':

—Channö nu bönni' ládjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

⁸ —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatërë' lo ca li'.

⁹ Ní'irö bönni' na' bulidzë' li' huidë' ga zu', en guíë' li': “Bë' lataj bönni' ni cö'ë ga zu'”, ate' ní'irö lu yöl-la' rutuí'i quiu' tsöjchö'u zxánitëlö.

¹⁰ Que lë ni na', cate' nu bönni' ulidzë' li', guyéaj yöjchó' zxánitëlö, para cate' idxinë' bönni' na' bulidzë' li', huë' li': “Bócha'a, gudödi ia'lati'

nilö.” Ní'irö gácaru' li' lo lógaca nupa ta'bö'len li' tsözxón. ¹¹ Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

¹² Jesús rë' ca' bönni' na' bulidzë' Lë', rnnë':

—Cati' gunu' tu güi'i huagu o tu lanído', biti' ulídzagacu'-në' yugu' böchi' luzó'o, en yugu' bönni' bóchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégaquië', tu' ulu'lidzë' ca' li', ate' caní gaca, ubí'i quiu'. ¹³ Cate' gunu' tu güi'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. ¹⁴ Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

¹⁵ Cate' tu bönni' rë'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

¹⁶ Jesús rë' lë':

—Zoë' tu bönni' benë' laní zxön, ate' zían nupa bulidzë'. ¹⁷ Cate' chinabá'a la' huagu, gusól-lë'ë bönni' huen dxin queë' tsöjödxe' nupa na' chinulidzë', gunné': “iGuli'dá! iYúgu'të chinabá'a!” ¹⁸ Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': “Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj.” ¹⁹ Ia'túë' rnnë': “Si' guzxi'a gayu' nózaba' bëdxi, ate' tsöjzxi' bë'a légacaba' ugúngaca'-ba' dxin. Ráta'yua' lo' gunnu' neda' lataj.” ²⁰ Ia'túë' rnnë': “Si' butsaga na'a, en que lë ni na' biti' gaca guída'.” ²¹ Cate' bóajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': “Guyéajtë na'a gapa naca lu yé'ëyi, en gapa naca la' nöza que yödzö ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la.” ²² Cate' chinunë' bönni' huen dxin na' caní, rnnë': “Xan, chibena' ca na' gunná bé'enu' neda', ate' ni dë lataj.” ²³ Ní'irö xanë' gudxë' bönni' huen dxin na', rnnë': “Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ilí lidxa', ²⁴ tu' rea' libí'ili': Biti' gahuë' que laní quia' nitúë' bönni' ni' bulidza' zí'alö.”

Le sáca'ru' cate' zéajlenru'-në' Cristo

²⁵ Yugu' dza ni' röjácalen Jesús bönachi zían, ate' buécjë' Jesús, en rë' légaquië':

²⁶ —Channö guí dalenë' neda' tu bönni', en biti' idxí'irönë' neda' ca nadxí'inë' xuz xiné'ë, en nigula queë', en yugu' zxí'inë', en yugu' bi'i bóchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. ²⁷ Nu bönni' biti' gáquië' ca tu bönni' sa'yéajë'

söjté'ë lë'e yaga cruz, ate' tē'ë neda', bití' gaca gáquiē' bönni' usēda quia'. ²⁸ Channö zoē' nu bönni' ladaj libí'ili' guē'ënnē' gunē' tu yu'u zían cuía, ñnarú' cabí cō'ē zí'alō ulabē' gáca'xi dumí ral-la' utōē' para inōzinē' channö dē queē' tsca le riquinnē' para údxi gunē' yu'u na'? ²⁹ Channö cabí gunē' caní, en isí lahuē' cuéquiē' xilibi yu'u na', ate' bití' gaca údxi gunē' yu'u na', ní'irō ila'sí lógaca yúgu'tē nupa ila'lé'e le ulu'titaj lē', ³⁰ ila'nná: "Bönni' ni gusí lahuē' runē' yu'u, pero bití' guca údxi gunē' le." ³¹ Lēasca' caní, channö zoē' nu bönni' rinná bē'ë, en ral-la' tsejē' gudil-la tsöjtíl-lalenē' ia'túē' bönni' rinná bē'ë, ñnarú' cabí cō'ē zí'alō, en cuéqui icjē' channö séqui'nē' tsöjtíl-lalenē' bönni' ni' naché'ë galaj milē' bönni', ate' lē' chi milsē' bönni' naché'ë? ³² Channö cabí séqui'nē', cate' ni' zoē' zi'tu' ia'túē' bönni' na' rinná bē'ë, isól-lē'ë bönni' gubáz queē', ate' inábinē' lē' nacxi ral-la' gunē' para ulu'dzáguiē' dxi'a. ³³ Caní naca, channö zoē' nu bönni' ladaj libí'ili' bití' ucá'anē' yúgu'tē le dē queē', bití' gaca gáquiē' bönni' usēda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunné' ca' Jesús:

—Dxi'a naca zödi', pero channö initi yöl-la' siná'a que, ñnacxi gaca úniru' le siná'a? ³⁵ Bítirō nazaca' zödi' na', calēga para luyú, en calēga para ga rirú'uniru' bēbu, pero chú'unaru' le ní'ilō. Nu zoa nagui, en riyōni, ral-la' uzé' nagui nu na'.

Rucúdzu'ë didza' Jesús ca naca queē'ba' bö'cu' zxila' gunítiba'

(Mt. 18:10-14)

15 ¹ Bulu'dubē' yúgu'tē bönni' tu'quízxjē' lázagaca bönachi, en yugu' bönni' cá'asō ga zoē' Jesús para ulu'zé' náguiē' Lē'. ² Que lē' ni na' yugu' bönni' yudo' fariseo, en yugu' bönni' yudo' usedi gula'nnē' queē' Jesús, ta'nnē':

—Bönni' ni runē' bal yugu' bönni' dul-la', en rágulenē' légaquiē'.

³ Ní'irō bucúdzu'ë didza' Jesús, rē' légaquiē':

⁴ —Channö zoē' tu bönni' ladaj libí'ili', nacué'aba' queē' tu gayuá'aba' bö'cu' zxila', en channö nítiba' tuba', ñnarú' cabí ucá'anē' ia'zícá'rōba' tápalalaj yu' chēnnaba' na' ga naca lu lataj cá'asō, ate' tsejē' tsöjdiljē'-ba' bö'cu' zxila' na' nanítiba', cate' udzólirōnē'-ba'? ⁵ Cate' udzólinē'-ba', lu yöl-la' rudzeja queē' ixóē'-ba' ya' zxicjē', ⁶ en cate' udxinē' lidxē' utubē' yugu' böchi' luzé'ë, en yugu' dzaga yu'u queē', ate' guíē' légaquiē': "Buli'dzéjalen neda', tu' chibudzólida'-ba' bö'cu' zxila' quia' gunítiba'." ⁷ Rea' libí'ili': Lēasca' caní gácatērō yöl-la' rudzeja yehua' yubá ni'a queē' tuē' bönni' dul-la' ubí'i ládxē'ë ca gaca quégaquiē' tápalalaj yu' chēnnē' bönni' tsahui', bönni' téquinē' bití' naquíniguequinē' ulu'bí'i ládxi'gaquiē'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queénu chi dumí plata, en channö initi tu dumí plata na', ñnaru' cabí uquéla'nu guí', ate' ulúanu yu'u, uguilaj yúdxinu le cate' udzólirönu le? ⁹ Cate' udzólinu le, utúbinu yugu' nigula luzá'anu, en yugu' nigula dzaga yu'u queénu, ate' guiénu légacanu: “Buli'dzéjalen neda', tu' chibudzólida' dumí plata na' guniti.” ¹⁰ Rea' libí'ili: Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxë'ë.

Rucúdzu'ë didza' Jesús queébi' tu bi'i gunítibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidi' na' rëbi'-në' xúzibi': “Dad, benna quia' le dë quiu' le ral-la' guequi quia'.” Ní'irö xúzibi' na' gudísië' quégacabi' le dë queë'. ¹³ Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzo zi'tu', ate' ni' butöbi' dërö le dë queébi'. Le ruá' dö' benbi'. ¹⁴ Cate' chibutöbi' dërö le dë queébi', guca gubín lu yödzo ga na' zóabi', ate' biyadzaj queébi'.

¹⁵ Ní'irö guyéajbi' yöjsóabi' huen dxin queë' tu bönni' lu yödzo ni', ate' bönni' na' gusól-lë'ë-bi' ga dë xiyúë' tsöjgágubi'-ba' yugu' cuchi queë'.

¹⁶ Guca ládxi'bi' gágubi' guixi' cá'asö na' táguba' cuchi, pero cuntú nu bi bë' le gágubi'. ¹⁷ Ní'irö bubí'i ládxi'bi', rnnabi': “Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún. ¹⁸ Uzá'a ni, huöja' ga zoë' xuzá', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'. ¹⁹ Bítirö naca' neda' lesaca' gaca' xzí'inu'. Ben neda' ca bönni' huen dxin quiu'.”

²⁰ Ní'irö guyú'ubi' nöza, söhuóajbi' ga zoë' xúzibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ládxë'ë-bi'. Carelö yöjzxi'galë'-bi' xúzibi', en yöjnidë' yenbi', gudahuë'-bi' zxixi. ²¹ Ní'irö xzí'inë' na' rëbi'-në': “Dad, bena' dul-la' lahuë' Dios, zoë' yehua' yubá, en lo' li'. Bítirö naca' neda' lesaca' gaca' xzí'inu'.”

²² Ní'irö xúzibi' rë' yugu' bönni' huen dxin queë', rnnë': “Guli'tsöjléajtë lari' nazáca'tërö, en guli'gacu-bi'. Guli'cú'u le nazaca' xibón ná'abi', en buli'dá' huarache ní'abi'. ²³ Guli'tsöjzxi'-ba' bëdxi renni', ate' guli'guti-ba'. Gáguru'-ba', en gunru' laní, ²⁴ tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a.” Ní'irö gula'sí lógaquië' tu'dzéjanë'.

²⁵ Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huö'a lu yu'u na'. ²⁶ Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca. ²⁷ Bönni' huen dxin na' rë'ë-bi': “Bi'i bóchu'u na' budxinbi', ate' gunná bë'ë xuzu' gulútië'-ba' bëdxi renni',

tu' budxinbi' lu në'ë dxi'a tsáhui'do'." ²⁸ Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yuë' lobi' tsú'ubi'. ²⁹ Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ílena' xibé yugu' luzá'a. ³⁰ Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queébi'." ³¹ Ní'irö xúzibi' rë'ë-bi', rnnë': "Zxí'ina', li' zóalen cazu' neda' ate' yúgu'të le dë quia', quiu' nequi. ³² Ben bayudxi gunru' laní, en udzéjaru', tu' gúcabi' bi'i bóchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

Rucúdzü'ë didza' Jesús queë' bönni' huen dxin biti' náquië' tsahui'

16 ¹ Jesús rë' ca' yugu' bönni' dá'gaquië' Lë', rnnë': —Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nnë' queë' rutösë' le dë queë' xanë' na'. ² Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu'? Buluí'i neda' le naca bë' dxin nunu', tu' cabirö gata' lu no'o uláz quia'." ³ Ní'irö guzá' ládxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'ida' inaba' nu bi gúnna'sö quia'. ⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. ⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?" ⁶ Lë' rnnë': "Tu gayuá' rë'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Guró'ötë ni, en buzúaj ia'tú lu guichi le inná chi-un rë'ö chugu ral-lu'u." ⁷ Gudödi ni' gunábinë' ia'túë', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a xxa' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." ⁸ Réquibel'enë' xanë' na' sína'të benë' bönni' huen dxin biti' náquië' tsahui' na'. Caní naca, nácagacarë' sina' bönni' yödzölió ni lu le tunë' la' légacasë', ca nácagaca bönachi ta'dalen Dios lu bení' queë'.

⁹ Neda' rea' libí'ili': Guli'cózalen bönachi dxi'a, ugunli' dxin yöl-la' tsahui' dë queé'li' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ Nu rugún dxi'a dxin tu le cuídi'sö dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídi'sö dë lu në'e, biti' ugún dxi'a dxin tu le zxön gata' lu në'e. ¹¹ Que lë ni na', channö cabí rugunli' dxi'a dxin yöl-la' tsahui' dë queé'li' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí

rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

¹³ 'Biti' gaca nitúë' bönni' huen dxin gunë' xichíngaca chopá xanë', tu' udí'inë' tuë', en idxí'inë' ia'túë', o gunë' bal tuë', en uzóë' tsölá'alö ia'túë' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que lë ni na' bulu'titjë' Jesús. ¹⁵ Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nózinë' Dios le yu'u icja ládxi'do'oli', tu' naca lë na' tun zxön bönachi tu le ruzóë' Dios tsölá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca inití tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alënë' nigula queë', ate' utsaga ná'alënë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alënë' nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzü'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' tē'aj tahuë' le banéquini. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzaj queë', ate' hué'tëzë' rō'ë ra' yu'u queë' bönni' na' rilé'enë' yöl-la' tsahui'. ²¹ Raca ládxë'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'ëba' lu huë' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. ²³ Cate' ni' riguí'i rizáquë'ë bönni' na' bilé'enë' yöl-la' tsahui', zoë' lataj quégaca nupa

nátigaca, guchisa lahuë', en bilé'enë' Abraham zoë' zi'tu', en dzáguie' Lázaro na' lë'. ²⁴ Ní'irö bē'ë zidzaj didza', rnnë': "Xuza', Abraham, buéchi' ladxi' neda'. Gusól-la' Lázaro quia' para usubisë' xibón nē'ë, en udusuhuóälë' lúdxá'a, tu' riguí'i rizáca'a lu guí' ni." ²⁵ Abraham rē' lë', rnnë': "Zxí'ina', busá' ládxi'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' riguí'i rizácu'u. ²⁶ Ia'stú, tu ra' guí'a sibi rö', le zoa gatsaj láhui'lö ga ni' zóali' libí'ili', en ga ni zóatu' netu'. Que lë ni na' nupa nacuá' ni, en ilé'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacuá' ni'." ²⁷ Ní'irö bönni' na' bilé'enë' yöl-la' tsahui' rē' lë', rnnë': "Xuza' Abraham, ráta'yua' lo' isól-lu'u-në' Lázaro tsejē' lidxē' xuza', ²⁸ tu' nacu'ë gáyu'ë bönni' bócha'a ni'. Gusól-lë'ë tsöjenë' liná' lo que le raca ni, para cabí guídigaquie' ca' lataj ga ni riguí'i rizáca'a." ²⁹ Ní'irö Abraham rē' lë', rnnë': "Dë quégaquie' le buzúajē' lu guichi Moisés, en le bulu'zúajē' lu guichi bönni' gulu'ë didza' uláz queë' Dios. Yugu' didza' quégaquie' na' ral-la' ulu'zé náguie'." ³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejē' ga na' nacu'ë, ulu'bí'i ládxi'gaquie'." ³¹ Abraham rē' lë', rnnë': "Channö cabí tu'zé náguie' didza' bē'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

Run bönadxi queéru' gunru' ga nu gun dul-la'

(Mt. 18:6-7, 21-22; Mr. 9:42)

17 ¹ Jesús rē' yugu' bönni' dá'gaquie' Lë', rnnë':
—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. ² Dxí'arö gaca queë' bönni' na' runë' caní, nu ugal-la' tu guió'j riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bi'i néquibi' quia'. ³ Guli'gún chi'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxi'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guié' li': "Rubí'i ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' tē' Lë', ta'nnë':

—Ben ga tséajlë'ërötu'-në' Dios.

⁶ Xanru' rē' légaquie', rnnë':

—La'tu' naca cuídi'sö yöl-la' réajlë' queé'li' Dios, nácasö ca tu xisedo' mostaza, huáca guié'li' yaga zxön ni: "Gucuíta ni, en yöjsó'a lu nísado'", ate' gun yaga na' ca rnnali'.

Le ral-la' gun nu naca huen dxin

⁷ Gunné' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bēdxi o rulapē', cate' údxi gunē' xichinē' xanē', ñnaru' huētsē' xanē' lē', innē': "Gudá, guró'ö gagu'?" ⁸ iCalēga! Caní guíē' lē': "Bupá'a le gahua'. Guzóa sina' cu'u le guí'aj gahua', ate' tódirö na' huáca guí'aj gagu' li'." ⁹ ñNaru' huētsē' bönni' nadó'o queë' na': "Xclenu'", tu' benē' ca gunná bé'enē' lē'? Runi neda', bití' gunē' caní. ¹⁰ Lēasca' caní gaca queé'li'. Cate' chinunli' yúgu'tē le gunná bé'enē' Dios libí'ili', ral-la' innali': "Nácatu' huen dxin cabí nácatu' lesaca', tu' bēnsötu' le run bayudxi guntu'."

Chië' bönni' té'enē' huë' nudzu' ruzödi

¹¹ Tsanni ni' yu'ë Jesús nöza, sa'yéajē' Jerusalén, ridödē' gapa dē yódzödo' nabábagaca luyú Samaria, en luyú Galilea. ¹² Cate' guyáziē' tu yódzödo', bila'rúajē' dutságagaquiē' Lē' chië' bönni' té'enē' huë' nudzu' ruzödi, ate' gula'cu'ë zí'tu'sö, ¹³ en tu'ë zidzaj didza', ta'nnē':

—iJesús, Bönni' Usedi! iBuéchi' ladxi' netu'!

¹⁴ Cate' bilé'enē' Jesús légaquiē', rē' légaquiē':

—Guli'tséaj, guli'tsöjlu'í cuinli' lógaca bixúz.

Tsanni ni' söjáquiē', bulu'huöáquiē' dxi'a. ¹⁵ Ní'irö tuë' bönni' nútsē'ë ládjagaquiē', cate' réquibe'enē' chinuhuöáquiē' dxi'a, böájē' ga na' zoë' Jesús, ruí'ítica'sē' zidzaj didza', rigu'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rē' Lē': "iXclenu'!"

Bönni' ni nababē' Samaria. ¹⁷ Ní'irö Jesús rē' lē':

—ñNaru' cabí bulu'huöáquiē' dxi'a chië' bönni'? ñGazxi nacué'tsē' ia'zíca'rē' bönni' na'? ¹⁸ ñNaru' cabí zoa nu huöda cu'u Dios yöl-la' ba, pero tuzē' bönni' zí'tu' ni?

¹⁹ Ní'irö Jesús gudxē' bönni' na', rnnē':

—iGuyasa, en böaj lidxu'! iChiböácu' dxi'a tu' réajlë'u neda'!

Ca idxín le rinná bē'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinē' Jesús bátaxi ral-la' idxín le rinná bē'ë Dios, Lē' bubi'ë didza', rē' légaquiē':

—Ca idxín le rinná bē'ë Dios, bití' naca le ilé'eli'. ²¹ Cuntu nu gaca inná: "iNi bidxín!", o inná: "iNi' bidxín!" iBuli'yútsöca'! iRinná bē'ë Dios lu icja ládxi'do'gaca bönachi!

²² Ní'irö Jesús gudxē' yugu' bönni' usēda queë', rnnē':

—Huadxín dza cate' gué'ënili' ilé'eli' dza huöda' neda', Bönni' Guljē' Bönachi, pero bití' ilé'eli' le. ²³ Ila'cuá' nupa ilé libí'ili': "iNi zoë'!", o ila'nná: "iNi' zoë'!" Bití' tséajli' ni', en bití' tséajlenli' légaquiē'. ²⁴ Ca

raca cate' rēpi yōsa, ruzení' idá'alö lúzxiba, lēasca' caní gaca cate' idxín dza huōda' neda', Bōnni' Guljē' Bōnachi. ²⁵ Zí'alö ca gaca lē ni, run bayudxi quí'i sáca'da', ate' bōnachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoē' Noé, lēasca' caní gaca cate' idxín dza huōda' neda', Bōnni' Guljē' Bōnachi. ²⁷ Dza ni'te na' gulē'aj gulahuē'. Bulu'tsaga ná'agaquiē', en bulu'dödē' zxí'inigaquiē' lu yöl-la' rutsaga na' ga bidxintē dza guyáziē' Noé lē'e barco zxōn na' nazí'i le arca, ate' bidxintē nisa guiōj usuniti yōdzölió le busuniti yúgu'tē'. ²⁸ Lēasca' caní guca dza ni' zoē' Lot. Gulē'aj gulahuē'. Gulá'uē', en gulúti'ē. Gulazē' xiyúgaquiē', en gulunē' yugu' yu'u quégaquiē'. ²⁹ Cate' bidxín dza na' burúajē' Lot lu yōdzö Sodoma, bōxaj guí' ca tu nisa guiōj, enca' le ruzéguida' nazí'i le azufre, ate' bulu'suniti yúgu'tē'. ³⁰ Lēasca' caní gaca cate' idxín dza uluí'i lahua' neda', Bōnni' Guljē' Bōnachi.

³¹ 'Cate' idxín dza na', channö zoē' tu bōnni' ícjo'olö, en dzö'ö le dē queē' lu yu'u na', bití' ral-la' huōtjē' tsōjzxi'ē le dē queē', ate' nu zoa la' guixi', lēasca' caní, bití' ral-la' huōjē' lidxē'. ³² Guli'sá' lādxi'li' ca guca queēnu nigula queē' Lot. ³³ Nu bōnni' ré'ēnē' gun chí'ē yöl-la' na'bán queē', unítíē' le, pero bōnni' udödē' yöl-la' na'bán queē' ni'a quia', udélē'ē le.

³⁴ 'Rea' libí'ili': Cate' idxín rēla na', ila'cu'ē chopē' bōnni' tsōzxōn ga tasiē', ate' tuē' uduzxi'a-nē', en ia'tué' ucá'ana' lē'. ³⁵ Ila'cuá'anu huētu tsōzxōn chópanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ē chopē' bōnni' la' guixi', ate' tuē' uduzxi'a-nē', en ia'tué' ucá'ana' lē'.

³⁷ Cate' bila'yōnnē' lē ni bōnni' usēda queē' Jesús, gula'nábinē' Lē', ta'nnē':

—Xan, ¿gazxi gaca lē ni?

Jesús rē' légaquiē':

—Ga dē tu le nati, ni' ulu'dubi quéziba' bíchulab.

Tu nigula uzēbi, en bōnni' ruchi'a rusöröē'

18 ¹ Ní'irö bucúdzu'ē didza' Jesús, rē' légaquiē' ca run bayudxi ulídzatica'siru'-nē' Dios, en bití' gaca chopa lādxi'ru'. ² Rnnē':

—Zoē' tu bōnni' ruchi'a rusöröē' tu yōdzö, bōnni' bití' rádxi'nē' Dios, en bití' runē' nu bōnni' bal. ³ La' yōdzö ná'asö zóanu tu nigula uzēbi, ate' bidxinnu nigula ni ga zoē' bōnni' ruchi'a rusöröē' na', rnnanu: “Buchi'a busöró le run quia' nu ruá' dö' quia'.” ⁴ Xidzé bití' gú'unnē' bi gunē' queēnu, pero gudödi ni' guzá' lādxi'ē, rnnē': “Bití' rádxi'da'-nē' Dios, en bití' runa' nu bōnni' bal, ⁵ pero tu' rupízxjanu nigula uzēbi ni neda', que lē ni na' uchi'a usöröa'-nu, para cabí guídati'ca'sinu ni, en para cabí tödi bē' upízxjanu neda'.”

⁶ Ní'irö Xanru' rē' légaquiē', rnnē':

—Guli'zé nágali' ca na' gunné' bönni' ruchia' rusöröë' na', bönni' biti' náquië' tsahui'. ⁷ ¿Naru' cabí uchi'a usöröë' Dios bönachi guró cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? ⁸ Rea' libí'ili': La' uchi'a usörótenë' légaquië'. Cate' huöda' neda', Bönni' Guljë' Bönachi, ¿naru' idzólida' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi. ¹⁰ Gunné':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'túë' na' náquië' bönni' ruquízxjë' lázagaca bönachi. ¹¹ Guzuínë' bönni' yudo' fariseo na', en caní bulidzë' Dios, rnnë': “Dios, rea' Li': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquízxaj ni. ¹² Neda' runa' gubasa chopá luzuí tu' xunu' dza huéaj, en runödzja' que yudo' tu' cö' huéaj tu' chi cö' que yúgu'të le rata' quia’.” ¹³ Guzóazë' zi'tu' bönni' uquízxaj na', en biti' böázxjanë' ichisa lahuë' uyúë' lúxiba, pero gudapë' luchu'ë, rnnë': “Dios, buéchi' ladxi' neda', bönni' dul-la’.” ¹⁴ Neda' rea' libí'ili': Bóajë' lidxë' bönni' uquízxaj na', nuhuöáquië' tsahui' lahuë' Dios, calëga ia'túë' bönni' ni'. Núti'tës bönni' run ba zxön cuinë', gunë' Dios ga huöta' igulë', pero nu bönni' rizóë' nöxaj ladxi', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'

(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quégaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. ¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Guli'güí'i-bi' lataj ila'dxinbi' bí'ido' ni ga zoa'. Biti' uzága'li' xinózagacabi', tu' gata' quégaca nupa nácagaca ca bi'i caní lataj ga rinná bë'ë Dios. ¹⁷ Le nácatë rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', biti' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'

(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rē'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ²⁰ Nöz quézinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatë.

Ben bal xuz xinó'o.

²¹ Bönni' na' rē' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rē' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnë' didza' ni, ruhuí'innë', tu' dëda' yöl-la' tsahui' queë'. ²⁴ Cate' bilé'enë' Jesús ca na' ruhuí'innë' bönni' na', rnnë':

—iBica' böniga gaca, ila'yaza nupa ta'l'é'e yöl-la' tsahui' ga rinná bë'ë Dios! ²⁵ Gácarö tódiba' böa' nagui yötsi', ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxë' légaquië':

—Le biti' gaca ilunë' bönni', huáca gunë' Dios.

²⁸ Ní'irö Pedro rē' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rē' légaquië':

—Le nácatë rea' libí'ili', nu bönni' ucá'anë' lidxë', o xuz xiné'ë, o yugu' böchi' zanë', o nigula queë', o yugu' zxí'inë', tu' ruí'i ládxë'ë inná bë'ë Dios, ³⁰ bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigúíxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

³¹ Jesús guché'ë quez queë' idxínnutë' bönni' usëda queë', en rē' légaquië':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljë' Bönachi. ³² Yugu' bönni' Jerusalén ulu'dödë' neda' lu ná'agaquië' bönni' zi'tu', ate' ulu'titjë' neda', en ulu'lidza zi'ë neda', en ulu'chejë' neda' zxöna'. ³³ Ila'guinë' neda', ate' tódirö ni' ilútië' neda', pero cate' gaca tsonna dza ubana'.

³⁴ Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'ilenë' légaquië' didza' que, tu' naca le cabí sequi' ila'yéajni'inë'.

Jesús ruúnë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

³⁵ Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnnasö queë'. ³⁶ Bönni' ni' biyönnë' ta'dödi bönachi zían ni', ate' gunabë' bizxi na' raca. ³⁷ Bönachi ni' të lë': —Jesús, bönni' Nazaret, ridödë' ni.

³⁸ Ní'irö bönni' na' nachul-la lahuë' bë'ë zidzaj didza', rnnë': —iJesús, zxí'ini xi'sóë' David, buéchi' ladxi' neda'!

³⁹ Yugu' bönni' nanórugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bë'ë didza', rnnë': —iZxí'ini xi'sóë' David, buéchi' ladxi' neda'!

⁴⁰ Ní'irö guzé' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

⁴¹ —¿Bizxi ré'ënu' guna' quiu'?

Bönni' na' nachul-la lahuë' rnnë':

—Ré'ënida' huóálaj guió'j lahua'.

⁴² Jesús rë' lë':

—Chibóálaj guió'j lo'. Chibóácu' tu' réajlë'u neda'.

⁴³ La' ní'isö bulé'etenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacuá' ni', en bila'lé'e lë na' guca gula'gú'u Dios yöl-la' ba.

Jesús, en Zaqueo

19 ¹ Ní'irö guyázië' Jesús yödzö Jericó, en ridödë' lu yödzö na'. ² Zoë' tu bönni' lë' Zaqueo ni', bönni' lo ládjagaquië' bönni' uquízxaj, ate' dë yöl-la' tsahui' queë'. ³ Ruí'i ládxë'ë bönni' ni' ilé'enë' Jesús, pero bití' guca queë' tu' nacuá' bönachi zían ni', en náquië' bönni' ga ré'ëdo'. ⁴ Ní'irö carelö yöjnóruë' lógaca bönachi zían na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'. ⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rë' lë':

—Zaqueo, bótjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bótjatë' Zaqueo lu yaga, ate' lu yöl-la' rudzeja queë' guché'ë Jesús lidxë'. ⁷ Cate' bila'lé'e bönachi nacuá' ni' lë ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá'analenë' bönni' dul-la'.

⁸ Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bē' buquizxja' bönachi, ubi'a quégaca bönachi na' tapa cō'tölö ca'.

⁹ Jesús rē' lē':

—Na'a dza ni bidxín yöl-la' rusölá quégaca nupa nacuá' yu'u ni, tu' nababē' bönni' ni di'a dza queē' Abraham. ¹⁰ Bida' neda', Bönni' Guljē' Bönachi, ududilja', en udusölá' nupa nanítigaca.

Rucúdzu'ē didza' Jesús que chi cō' dumí

¹¹ Tsanni ni' ta'yönnē' didza' ni ru'ē Jesús, rē' légaquiē' le rucúdzu'ē didza', tu' chizóa ila'dxinē' yödzö Jerusalén, ate' téquinē' chizóatē ilá' lahui le rinná bē'ē Dios. ¹² Caní rnnē' Jesús:

—Zoē' tu bönni' lo, sa'yéajē' tu yödzö zi'tu' para si' lu nē'ē yöl-la' unná bē', ate' ní'irö huödē'. ¹³ Cate' chizóa tsejē' ni' bulidzē' chiē' bönni' huen dxin queē', en bē'ē que queégaquiē' tu cō' huéaj dumí, ate' rē' légaquiē': "Guli'guílajlen dumí ni tsanni huöda'." ¹⁴ Yugu' bönni' uládz queē' bití' ta'lé'enē' lē' dxi'a, ate' gula'söl-lē'ē yugu' gubáz quégaquiē' ga ni' tsejē', ila'nnē': "Bití' ré'ēnitú' inná bē'enē' bönni' ni netu'."

¹⁵ Ní'irö guzxí' lu nē'ē yöl-la' unná bē', ate' budxinē' ladzē'. Cate' bidxinē' ni' gunná bē'enē' nu tsöjlidza yugu' bönni' huen dxin na' budödē' lu ná'agaquiē' dumí na', para inózinē' gáca'xi bulu'guílajlenē' le tu tuē'. ¹⁶ Cate' bönni' zí'alö na' bidxinē' lahuē', rnnē': "Xan, tu cō' dumí quiu' na' chibén icja ia'chí cō' ca'." ¹⁷ Xanē' na' rē' lē': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bē'enu' chi yödzö." ¹⁸ Ní'irö bidxinē' ia'túē' bönni' huen dxin na' lahuē' lē', rnnē': "Xan, tu cō' dumí quiu' na' chibén icja ia'gayu' cō' ca'." ¹⁹ Xanē' na' rē' ca' lē': "Inná bē'enu' gayu' yödzö."

²⁰ Ní'irö bidxinē' ia'túē' lahuē' lē', rnnē': "Xan, ni dē tu cō' dumí quiu' na'. Ben chi'a le, butúlida' le lari'. ²¹ Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga bití' guzu'." ²² Ní'irö xanē' na' rē' lē': "Nacu' huen dxin bití' naca tsahui'. Ni'a que didza' bē'u uchi'a usöró'a li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga bití' guza'?" ²³ Na'a, ¿bizx que bití' yöjlú'u dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rē' nupa nacuá' ni': "Guli'cúa lu nē'ē dumí na', ate' guli'güí'i queē' bönni' na' dē queē' chi cō' dumí."

²⁵ Légaquiē' tē' lē': "Xan, chidé queē' chi cō' dumí." ²⁶ Ní'irö bubi'ē didza' xángaqüē', rnnē': "Rea' libí'ili': Nu rugún dxi'a dxin le do' dē lu nē'e, ulu'zxöni ládxi'gaca lē' ia'late', pero nu bití' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e." ²⁷ Ca naca quégaquiē' bönni' ni' bití' ta'lé'enē' neda' dxi'a, en bití' gulé'ēnnē' inná bē'eda' légaquiē', guli'tsöjzxi' légaquiē' para ídigaquiē' ni, ate' guli'guti légaquiē'."

Len yöl-la' ba zxön razië' Jesús yödzö Jerusalén

(Mt. 21:1-11; Mr. 11:1-11; Jn.12 :12-19)

²⁸ Cate' budxi gunné' caní Jesús, buguélë'ë xinözë', sa'yéajë' zaca' yödzö Jerusalén. ²⁹ Cate' bila'dxinë' gala' ga nacua' yödzö Betfagé, en yödzö Betania, ga naca ra' guí'ado' nazí'i le Guí'a Yaga Olivo, gusól-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödzödo' ni' ca dódilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntú nu ribíani lëba'. Guli'sedxi-ba', en guli'duché'-ba' quia' ni. ³¹ Channö zoa nu rinábini libí'ili', inná: “¿Bizx que risédxili'-ba'?", ubí'ili' didza' caní innali': “Xanru' riquinnë'-ba'.”

³² Söjáquië' bönni' usëda queë' na' nasól-lë'ë, ate' yöjxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xanba' të' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

³⁵ Gula'ché'ë-ba' ga na' zoë' Jesús. Cate' chigula'xóë' yugu' lari' tsölá'a quégaquië' cúdzu'ba' búrrodo' na', bulu'dxíë' Jesús cúdzu'ba' lahui lari' na'. ³⁶ Gapa ral-la' tödë' Jesús, gula'chiljë' lari' quégaquië' la' nöza.

³⁷ Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. ³⁸ Ta'nnë':

—iYöl-la' ba bönni' unná bë' ni zë'ë uláz queë' Xanru' Dios! iYehua' yubá za' le ribequi dxi ládxi'ru'! iYöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zían ni' të' Jesús, ta'nnë':

—iBönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rë' légaquië':

—Rea' libí'ili': Channö ila'cuá' dxíë' bönni' ni, yugu' guió'j hualuí'i caz zidzaj didza'.

⁴¹ Cate' bidxinë' Jesús gala' ra' yödzö na', en rilé'enë' le, ní'irö ribödxë' que, ⁴² rnnë':

—Raca ládxa'a huanó'zili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queé'li', para cabí ilé'eli' le.

⁴³ Huala'dxín queé'li' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lë'alö, ate' yúgu'të lataj idú gásibi'ilö ilúnlenë' libí'ili' gudil-la. ⁴⁴ Ulu'quínajë' zö'ö run chí'i yödzö queé'li', en ilútië' nupa nacua' lu yödzö ni. Biti' ugá'ana guió'j lahui luzé'e. Yúgu'të lë ni gaca queé'li' tu' cabí gúquibe'eli' dza bidë' Dios buduyüë' libí'ili'.

Rulatjē' Jesús lö'a yudo'
(Mt. 21:12-17; Mr. 11:15-19; Jn.2 :13-22)

⁴⁵ Ní'irö guyáziē' Jesús lö'a yudo', en gusí lahuē' rubéajē' ní'ilö yúgu'tē nupa tuti', en nupa to'o ga naca lö'a yudo'. ⁴⁶ Rē' légaquiē':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédinē' Jesús bönachi ga naca chila yudo', ate' gula'zóa gula'bö'ē bixúz unná bē', len bönni' yudo' tu'sédinē', en yugu' bönni' lo que lu yödzo ilútiē' Lē'. ⁴⁸ Biti' bulu'dzólinē' nacxi ilútiē' Lē', tu' idú ládxi'gaca tu'zé nágagaca yúgu'tē bönachi xtídzē'ē.

Yöl-la' unná bē' dē lu nē'ē Jesús
(Mt. 21:23-27; Mr. 11:27-33)

20 ¹ Tu dza, cate' ni' rusédinē' Jesús bönachi ga naca chila yudo', en riguíxjö'ē didza' dxi'a, bila'dxinē' yugu' bixúz unná bē', en bönni' yudo' tu'sédinē', len bönni' gula tu'zéajni'inē', ga na' zoē', ² ate' tē' Jesús:

—Gudixjöi'i netu'. ¿Bizxi yöl-la' unná bē' dē lu no'o runu' caní? ¿Nuzxi caz budödi lu no'o yöl-la' unná bē' ni?

³ Bubi'ē didza' Jesús, rē' légaquiē':

—Inábida' ca' libí'ili' tu didza', ate' ubí'ili' innali'. ⁴ ¿Nuzxi gusól-la' Juan ruquilē' bönachi nisa? ¿Naru' Dios, o bönachi?

⁵ Gulún xtídzagaquiē' la' légacasē' bönni' yudo' na', ta'nné':

—Channö innaru': Gusól-lē'ē Dios lē', guíē' rē'u: “¿Bizx que biti' guyéajlē'ēli'-nē'?” ⁶ Channö guiéru'-nē': Gula'sól-lē'ē yugu' bönni' lē', bönachi lu yödzo ni ulu'ladxi' rē'u guióǵ, tu' nóziguequi bē'ē didza' Juan na' uláz queē' Dios.

⁷ Ní'irö bulu'bi'ē didza', ta'nné':

—Biti' nöztu' nuzxi na' gusól-la' Juan.

⁸ Ní'irö Jesús rē' légaquiē':

—Neda' ca' biti' guía' libí'ili' bi yöl-la' unná bē' rúnida' caní.

Yugu' bönni' huen dxin biti' nácagaquiē' tsahui'
(Mt. 21:33-44; Mr. 12:1-11)

⁹ Ní'irö la' gusí lotē' Jesús ruí'ilenē' bönachi nacuá' ni' didza'. Rucúdzu'ē didza', rnnē':

—Zoē' tu bönni' budē'ē yugu' lubá uva lu xiyúē', ate' budödē' luyú na' lu ná'agaquiē' bönni' huen dxin para ilún gatsjē' len lē' le ulu'zi'ē, ate' guyijē' zi'tu' ga ni' bugá'anē' xidzé. ¹⁰ Cate' bidxín dza ulu'chibē' uva luyú na', gusól-lē'ē tuē' bönni' gubáz queē' ga na' nacu'ē huen dxin na' para si'ē uláz queē' que le ulu'zi'ē, pero huen dxin na' gulúndē'ē lē' zi', en bulu'sól-lē'ē lē' cá'asö. ¹¹ Leyúbölö gusól-lē'ē ia'túē' gubáz queē',

ate' légaquië' gulúndë'ë lë' ca' zi', en gulu'ë dö' queë', ate' bulu'sól-lë'ë lë' cá'asö. ¹² Leyúbölö gusól-lë'ë quégaquië' bönni' bunni gubáz queë', ate' bulu'dxíë' ca' lë' huë', en bulu'béajë' lë' ní'ilö luyú na'.

¹³ 'Ní'irö guzá' ládxë'ë xani luyú na', gunné': "¿Nacxi guntsa'? Isól-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal." ¹⁴ Ní'irö, cate' yugu' bönni' huen dxin na' bila'lé'enë'-bi', gulún xtí'dza'gaquië' la' légacasë', ta'nné': "Bi'i ni guequi queé'bi' luyú ni. Guli'dá, gútiru'-bi', para guequi queé'ru' le ral-la' guequi queé'bi'."

¹⁵ Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'? ¹⁶ Guídë', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacuá' ni' bila'yöni lë ni, gula'nné':

—iInná Dios biti' gaca caní!

¹⁷ Ní'irö buyúë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rna:

Guiój na' gula'ru'unë' bönni' huen zö'ö,

guiój ni chinaca guiójlen squin zö'ö?

¹⁸ Núti'tës nu ibixi lahui guiój ni, quitsaj nu na', ate' nu bönni' tsöjbága' guiój ni lë', uzzuxxaj lë'.

Ca naca dumí ta'guixxaj lázagaca bönachi

(Mt. 21:45-46; 22:15-22; Mr. 12:12-17)

¹⁹ La' dza ní'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdu'ë didza', pero guládxinë' bi ilún bönachi zían nacuá' ni'.

²⁰ Ní'irö bulu'yúyenië' Jesús, en gula'sól-lë'ë yugu' bönni' para ulu'béajë' Lë' didza', bönni' ulu'luí'i cuíngaquië' ca bönni' tsahui', para ilunë' ga bi inné' Jesús, para gaca ulu'dödë' Lë' lu në'ë bönni' rinná bé'enë' uláz queë' César. ²¹ Para ilunë' caní, gula'nábinë' Jesús, ta'nné':

—Bönni' Usedi, nöztu' rno' le nácatë, en rusédinu' le nácatë, en biti' ruchi'a rusöróu' ca naca le tu'luí'isö lahui bönachi, pero idútë li naca ca rusédinu' xibá queë' Dios. ²² Gudíxjöi'i netu'. ¿Naru' run bayudxi quixxaj laztu' queë' César, bönni' Roma rinná bë'ë, o cabí?

²³ Réquibe'enë' Jesús le té'ënnë' ilunë' queë', ate' rë' légaquië':

—¿Bizx que rizí' bë'ëli' neda'? ²⁴ Buli'luí'itsöqui' neda' tu dumí ridá.

¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nné':

—Queë' César na'.

²⁵ Ní'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

²⁶ Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'bábinë' ca naca didza' bubi'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

²⁷ Ní'irö yugu' bönni' yudo' saduceo, nupa na' ta'nná bití' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

²⁸ —Bönni' Usedi, Moisés buzúajë' queëru' lu guichi, le rnna: “Channö gátie' nu bönni', ate' ugá'ananu nigula queë', en channö cuntú nu zoa bi'i queë', ní'irö bi'i bóchi'bi' ral-la' sí'ibi'-nu nigula queë' na', para uzóabi' bi'i queëbi' bóchi'bi' na' gútibi'.” ²⁹ Gula'cuá'abi' gadxi bi'i bönni' nácagacabi' bóchi'bi', ate' bi'i zí'alö na' butsaga ná'alénbi' bi'i nigula, en gútibi', bití' zóabi' bi'i queëbi'. ³⁰ Ní'irö bi'i buropi na' butsaga ná'alénbi'-nu nigula na', ate' gútibi' ca' bi'i ni, bití' zóabi' bi'i queëbi'. ³¹ Butsaga ná'alénbi'-nu bi'i bunni na', ate' la' tuz ca gulunbi' igádxitébi', ate' gulátibi', bití' zóabi' bi'i quégacabi'. ³² Ga búdxité, gútinu ca' nigula na'. ³³ Na'a, cate' ulu'bán nupa chinátigaca, ñnúzxilöbi' guéquinu nigula na' queëbi', tu' bulu'tsaga ná'alénbi'-nu igádxitébi'?

³⁴ Ní'irö bubi'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzjé'-bi' xzí'inigaquië' para ulu'tsaga ná'agacabi'. ³⁵ Na'a, nupa nácagaca lesaca' ulu'bán lu yöl-la' guti, en tsöjcuá' yödzölió si' gata', bití' ilún yöl-la' rizóalen nigula, en bití' ulu'tsaga ná'agaca. ³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca xzí'ini cazë' Dios. ³⁷ Ca na' ral-la' ulu'bán nupa chinátigaca, rulu'ínë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi xzí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' xzí'inë' David”? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

“Gurö'i cuita lë'a ibëla

⁴³ cate' gunra' ga ulu'zechu xzíbigaca lo' nupa ta'dá'baga' Li'.”

⁴⁴ David caz na' gunné' queë' náquië' Xanë'. ¿Nacxi caz naca, rnnali' libí'ili' náquië' zxí'inë'?

Jesús ruzégui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönachi nacuá' ni' tu'zé nágagaca Jesús, rë' yugu' bönni' usëda queë':

⁴⁶ —Guli'gún chi'i cuinli' quégaquië' bönni' yudo' tu'sédinë', tu' ta'yaza ládxi'gaquië' ta'dé' nácugaquië' lari' tunna, en té'ënnë' ulu'lidza bönachi légaquië' zxön gapa naca lu yé'ëyi, en ta'yaza ládxi'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'.

⁴⁷ Ta'gúë' lídxigacanu nigula uzébido', ate' para ulu'luí'i tsahui' cuíngaquië', xidzé tu'lidzë' Dios. Yugu' bönni' ni, yénni'tërö gunë' Dios ga ila'guí'i ila'záquië'.

Gun le gulú'unu tu nigula yechi' lahuë' Dios

(Mr. 12:41-44)

21 ¹ Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu guí'ina que dumí gun que yudo'. ² Bilé'enë' ca' tu nigula yechi' uzébido', rigú'unu chopá dumí lásido', le nazáca'gaca láti'do'os. ³ Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzébido' ni ca ia'zíca'rö bönachi na' ta'gu'ë dumí. ⁴ Yúgu'të, tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queënu gulú'unu idútë le dë queënu, le ral-la' gáhuinu.

Rigúíxjö'ë Jesús ca ulu'sunítie' yudo'

(Mt. 24:1-2; Mr. 13:1-2)

⁵ Nacuá' ni' nupa tuí'i didza' ca naca que yudo' na', ca na' nazí'i biquitaj que, yugu' guió'j nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶ —Yúgu'të lë ni rilé'eli', huadxín dza cate' bíti'rö ugá'ana guió'j lahui luzé'e ni, tu' ulu'suniti bönachi yudo' ni.

Le ilaca bë' cate' si' idxín dza údxí

(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizó'a gaca caní?

⁸ Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'zí'i lágaquië' ca lea' neda', ila'nnë' nácagaquië' Cristo, en ila'nnë': “Chizá' gala' dza údxí.” Neda' rea' libí'ili': Biti' tséajlenli' légaquië'. ⁹ Cate' yónili' raza gudil-la, en ta'dá'baga' bönachi

yúlahui', biti' gadxi idzóbili', tu' run bayudxi ilaca le caní, pero biti' zuítëni dza údxi.

¹⁰ Ní'irö rë' ca' légaquië':

—Til-la tu yödzo len ia'tú yödzö, ate' bönachi tu ga nu rinná bë' ila'díl-lalen bönachi ia'tú ga nu rinná bë'. ¹¹ Tódigaca budó' zxu', ate' zían lataj gaca gubín, en ilatsaj yödzöhué' zxön. Ila'lá' lahui lúzxiba le ilún gadxi bönachi, en le ilaca bë'.

¹² 'Zí'atëlö cate' si' ilaca lë ni, ila'zón bönachi libí'ili', en ila'bía ládxi'gaca libí'ili'. Ila'ché'ë libí'ili' gapa tu'dubë' tu'sedë' queë' Dios para ilútië' libí'ili', en ila'gu'ë libí'ili' lidxi guíë. Ila'ché'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. ¹³ Gaca caní queë'li' para séqui'li' gunli' ba nalí quia' neda'. ¹⁴ Tsutsu guli'gún ládxi'li', para cabí cuéqui ícjali' zí'aló nacxi innali' uláz queë'li', ¹⁵ tu' gunna' queë'li' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nné' que xtídza'li' bönni' ni' biti' ila'lé'enë' libí'ili' dxi'a. ¹⁶ Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútië' bál-lali'. ¹⁷ Yúgu'të bönachi ulu'zóa libí'ili' tsölá'aló tu' dá'ali' neda', ¹⁸ pero biti' initi nitú guitsa' ícjali'. ¹⁹ Channö ugá'anali' tsutsu, idéli'li' yöl-la' na'bán idú.

²⁰ 'Cate' ilé'eli' bönni' röjáquië' gudil-la nagú'ugaquië' lë'a Jerusalén, inózili' chibidxín dza initi yödzö ni. ²¹ Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. ²² Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. ²³ Cate' idxín dza ni', bica' bayechi' yugu' nigula nuá'gacanubi' bí'ido' si' ilaljbi', en nigula tu'gádxi'nu-bi' bí'ido', tu' ila'guí'i ila'záca'da' bönachi nacuá' ni', ate' Dios gúndë'ë bönachi ni' xíguia'. ²⁴ Ilátië' zíanë' lu gudil-la na', ate' ila'ché'ë ia'bal-lë' nadzúngaquië' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

Le ilaca bë' si' huödë' Bönni' Guljë' Bönachi

(Mt. 24:29-35, 42-44; Mr. 13:24-37)

²⁵ Gunnë' ca' Jesús:

—Ní'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzölió, en ila'zxizi le nalá'gaca lúzxiba. ²⁷ Ní'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'. ²⁸ Cate' isí lo ilaca lë ni,

buli'tipa ládxi'li', en guli'chisa loli', tu' chizóa udxina' neda', para huöá'ua' libí'ili'.

²⁹ Jesús gudxë' ca' légaquië' tu le bucúdzu'ë didza', rnnë':

—Buli'yútsöca' ca raca que yaga higo, en que bíti'tës yaga yúbölö.

³⁰ Cate' rilé'eli' ta'lén ni'a nê'e hué'ënido', nöz quézili' chizá' gala' cusu ba. ³¹ Lësca' caní, cate' ilé'eli' chitaca yugu' lë ni, inózili' chizá' gala' dza idinná bë'ë Dios luyú ni.

³² 'Le nácatë rea' libí'ili', bití' ilátigaca bönachi ila'cuá' dza ni' cate' ilaca yúgu'të lë ni. ³³ Ila'dödi que lúzxiba, en que luyú ni, pero xtídza'a, bití' tödi cá'asö, tu' idxín caz ca rnna.

³⁴ 'Guli'gún chi'i cuinli' para cabí güi'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí', para cate' idxín dza ni', cabí sóali' niti ladxi', ³⁵ en para cabí gaca queéli' ca tu le rizón bönachi, ca naca le gaca quégaca yúgu'të bönachi nacuá' idútë yödzölió. ³⁶ Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljë' Bönachi.

³⁷ Lahui' dza rizóë' Jesús chila yudo', rusédinë' bönachi, ate' chi'i dzó'ölö rirúajë' ni', en rejë' lu guí'ado' nazí'i le Guí'a Yaga Olivo.

³⁸ Yugu' zila bila'dxín yúgu'të bönachi ga zoë' Jesús chila yudo' para ulu'zë náagaca xtídzë'ë.

Tun xtídza'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11 :45-53)

22 ¹ Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', ² bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéqui'në' tu' tádxinë' bi ilún bönachi.

³ Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasól-lë'ë Cristo. ⁴ Guyijë' Judas na', yöjé'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. ⁵ Bulu'dzéjanë' bönni' yudo' na', en gula'zí' lu ná'agaquië' ulu'nödzjë' queë' dumí. ⁶ Raza ládxi'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13 :21-30; 1Co. 11 :23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. ⁸ Jesús gusól-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lë':

—¿Gazxi ré'ënu' tsöjpá'atu' queéru'?

¹⁰ Jesús rë' légaquië', rnnë':

—Buli'yútsöca', cate' tsú'uli' lu yödzo ni, irúajë' tu bönni' dutságuië' libí'ili', sönju'ë tu rö'ö nisa. Guli'tséajlenë' ga idxíntëli' yu'u ga tsázië'.

¹¹ Guli'guíë' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?" ¹² Ní'irö uluí'inë' libí'ili' tu yu'u xzön xitsá' ga ni' chinabá'a. Buli'pá'a ni' le gáguru'.

¹³ Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pé'ë ni' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bó'lenë' Lë' tsözxón. ¹⁵ Ní'irö Jesús rë' légaquië':

—Gúcada' ládxa'a gágulena' libí'ili' tsözxón xtsö' ni zí'atëlö cate' si' qui'i saca'a, en gátia'. ¹⁶ Rea' libí'ili': Bítirö gahua' lë ni cate' idxinrö dza gaca le ruluí'isö xtsö' ni ga ni' rinná bë'ë Dios.

¹⁷ Gudélë'ë Jesús tu xzíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'guí'aj lati' huéaj, ¹⁸ tu' rea' libí'ili': Bítirö guí'ja' xisi uva cate' idxinrö le rinná bë'ë Dios.

¹⁹ Ní'irö gudélë'ë yöta xtila, en gudxë' Dios: "Xclenu'." Gudödi ni' buzzuxjë' le, en bë'ë que queégaquië', rnnë':

—Lë ni naca idútë le naca' le rudöda' uláz queéli'. Guli'gún caní para usá' ládxi'li' neda'.

²⁰ Cate' budxi gulahuë', lësca' caní bë'ë didza' que xzíga'do' na', rnnë':

—Xzíga'do' ni ruluí'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queéli'.

²¹ Na'a, bönni' na' udödë' neda' lu ná'agaca bönachi rö'ë rágulenë' neda' tsözxón. ²² Le nácatë huayija' ga ilútië' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tuí'i xtídza'gaquië' núzxilögaquië' gáquië' lo

²⁴ Ní'irö gulu'ë didza' la' légacasë' núzxilögaquië' idéli'në' lataj lo.

²⁵ Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen. ²⁶ Libí'ili' biti' ral-la' gunli' caní, pero nu naca lo ladjali' ral-la' gaca ca nu naca cuídi'tërö, ate' nu rinná bë' ral-la' gaca ca nu run dxin quéguequi luzé'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' ni guzóalenli' neda' cate' ni' bi guca quia', yugu' le gula'zí' bē' neda'. ²⁹ Que lē ni na' udōda' lu ná'ali' tu ga inná bē'ēli', ca na' benē' Xuza', budōdē' lu na'a ga inná bē'a neda'. ³⁰ Caní guna' para gaca có'ōli', en guí'aj gágulenli' neda' ga ni' inná bē'a, ate' có'ōli' xilataj cázali' ga uchi'a usöröli' idxinnu cō' zxí'ini xi'sóē' Israel.

Rnnē' Jesús innē' Pedro biti' núnbē'ē Lē'

(Mt. 26:31-35; Mr. 14:27-31; Jn. 13 :36-38)

³¹ Gunnē' ca' caní Xanru':

—Simón, Simón. Buyútsōca'. Chigunaba Satanás tu' xihui' libí'ili', para urixi udōdi libí'ili' ca nu rurixi rudōdi xzoa' xtila, ³² pero chibulidza'-nē' Dios, en gunábida' Lē' gácalenē' li', para cabí údxí udú yöl-la' réajlē' quíu' neda'. Na'a, cate' huōácu' quia', butipa ládxi'gaquiē' böchi' luzó'o.

³³ Pedro rē' Lē':

—Xan, chizóa' sá'lēna' Li', calégasō tseja' lidxi guíē, pero lēasca' gátīlēna' Li'.

³⁴ Jesús rē' lē':

—Pedro, rea' li': Zí'alō códxiba' böra na'a, chigudá'bagu'u tsonna luzuí, innó' cabí núnbē'u neda'.

Le benē' Jesús cate' chizóa ilútiē' Lē'

³⁵ Jesús gunábinē' légaquiē', rnnē':

—Cati' gusól-la'a libí'ili' cabí nuá'ali' yōxaj yōta, en calēga buzudi dumí, en calēga chopa cō' xiráchuli', ¿narú' bi biyadzaj queēli'?

Légaquiē' ta'nnē':

—Biti' bi.

³⁶ Ní'irō rē' légaquiē':

—Na'a, nu dē yōxaj yōta que ral-la' guá' le, ate' lēasca' caní ral-la' gun nu dē que buzudi dumí, ate' nu biti' dē que guíē tuchi' ral-la' guti' lari' rixóa yení, en si' tu guíē tuchi'. ³⁷ Rea' libí'ili': Run bayudxi gaca quia' lē na' nazúaj lu guichi lá'ayi, rnna: “Gulunē' queē' ca tunē' quégaca nupa tua' dö”, ate' ilaca yúgu'tē le nazúajgaca lu guichi ca ral-la' gaca quia'.

³⁸ Ní'irō légaquiē' ta'nnē':

—Xan, ni dē chopa guíē tuchi'.

Lē' rē' légaquiē':

—Chinaca.

Jesús rulidzē' Dios la' yēla Getsemaní

(Mt. 26:36-46; Mr. 14:32-42)

³⁹ Ní'irō birúajē' Jesús, en ca run cazē' sa'yéajē' lu Guí'a Yaga Olivo, ate' yugu' bōnni' usēda queē' sōjácālenē' Lē'. ⁴⁰ Cate' bila'dxinē' ni', Jesús rē' légaquiē', rnnē':

—Buli'lídzè' Dios, inábili'-nè' cabí gata' lataj si' bè' tu' xihui' libí'ili'.

⁴¹ Ní'irö Jesús guzé'è ga na' nacu'è, en gudödè' ia'lati' tsca ga ridxín tu guió'j rirú'uniru', ate' ni' buzóa zxibè', en rulidzè' Dios. ⁴² Rnnè':

—Xúz, channö ré'ènu', bucuása ga zoa' lè na' ral-la' quí'i saca'a, pero calèga ca ré'ènda' neda', pero ca ré'ènu' Li' gunu'.

⁴³ Ní'irö bulu'í'i lahuè' gubáz lá'ayi queè' Dios, zè'è yehua' yubá, ate' butipè' ládxè'è Jesús. ⁴⁴ Lu yöl-la' risèbi ladxi' queè', idú ládxè'è Jesús bulidzè' Dios, ate' nisa yösa queè' guca ca rön raba' luyú.

⁴⁵ Cate' budxi bulidzè' Dios, guyasè', en bóajè' ga na' nacu'è bönni' usèda queè', ate' duxáquiè' légaquiè' tásiè' tu' tu'huí'inigaquiè'. ⁴⁶ Ní'irö Jesús rè' légaquiè':

—¿Rásitsali'? ¡Guli'chasa, en buli'lidzè' Dios! Inábili'-nè' cabí gata' lataj si' bè' tu' xihui' libí'ili'.

Ta'zönè' Jesús

(Mt. 26:47-56; Mr. 14:43-50; Jn.18 :2-11)

⁴⁷ Tsanni ni' ru'è didza' Jesús, la' bila'dxintè' bönni' zían ni', ate' Judas, bönni' na' nababè' idxínnuè' bönni' usèda queè' Jesús dzáguiè' légaquiè', ate' nanóruè' lógaquiè' bönni' zían na'. Gubígui'è ga zoè' Jesús para utsaga lahuè' Lè'. ⁴⁸ Ní'irö Jesús rè' lè':

—Judas, ¿naru' rudóditso' caní neda', Bönni' Guljè' Bönachi, rutsaga lo' neda'?

⁴⁹ Cate' yugu' bönni' na' nacuá'lenè' Jesús bila'lé'enè' ca na' raca queè' Lè', tè' Lè':

—Xan, ¿naru' güí'itu' légaquiè' guíè tuchi'?

⁵⁰ Tuè' bönni' usèda queè' Jesús benè' huè' guídi náguiè' bönni' huen dxin queè' bixúz lo. Burixè' guídi náguiè' ibèla. ⁵¹ Jesús rnnè':

—Chinaca na'a. Tsca' gaz.

Gudanè' Jesús guídi náguiè' bönni' huen dxin na', en bunè' le.

⁵² Ní'irö rè' yugu' bixúz unná bè', en bönni' dè lu ná'agaquiè' que yudo', en bönni' gula tu'zéajni'inè', bönni' na' biti' ta'lé'enè' Lè' dxi'a, rnnè':

—¿Narúajtsali' nuá'ali' guíè tuchi', en yaga para sönli' neda' ca runli' rizönli'-nè' gubán? ⁵³ Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxín dza queéli', le naca dza dè lu nè'e nu na' zoa lataj chul-la.

Rnnè' Pedro: "Biti' núnbè'a-nè' Jesús"

(Mt. 26:37-58, 69-75; Mr. 14:53-54, 66-72; Jn.18 :12-18, 25-37)

⁵⁴ Ní'irö gula'zönè' Jesús, en gula'ché'è Lè' ga na' bulu'sudxinè' Lè' lidxè' bixúz lo. Pedro yöjnahuè' Jesús zi'tu' zí'tu'sö. ⁵⁵ Cate' ni'a nè'è bixúz lo chigula'béquiè' guí' lö'a lidxè' bixúz lo na', gula'bö'è idú gásibi'ilö ra' guí' na', ate' Pedro guró'lenè' légaquiè' tsözxón. ⁵⁶ Cate'

tubi' bi'i nigula huen dxin bilé'ebi'-nē' Pedro, ni' rō'ösē' ra' guí', buyubi' lē', en rnnabi':

—Bönni' ni dē'ē ca' Jesús.

⁵⁷ Gudá'baguiē' Pedro, rnnē':

—Nigúla, biti' ca' núnbē'a-nē' bönni' na'.

⁵⁸ Ia'lati' gudzé ia'túē' bönni' bilé'enē' Pedro, ate' rnnē':

—Li' do'o ca' légaquiē'.

Pedro gunné':

—Bönni', calēga neda'.

⁵⁹ Ia'láti'sö gudzé, gunné' ia'túē' bönni':

—Le nácatē bönni' ni dē'ē Jesús, tu' náquiē' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ē didza' ni, la' guródxitēba' böra. ⁶¹ Ní'irö buécjē' Xanru', en ruyúē' Pedro, ate' yōjnenē' Pedro xtídzē'ē Xanru', ca na' gudxē' lē': "Zí'alö códxiba' böra na'a, li' chigudá'bagu'u tsonna luzuí, innó' biti' núnbē'u neda'." ⁶² Burúajē' Pedro ní'ilö, ate' rön caz guródxē'.

Tu'titjē' Jesús

(Mt. 26:67-68; Mr. 14:65)

⁶³ Yugu' bönni' na' nazóngaquiē' Jesús bulu'titjē' Lē', ate' gula'guínē' Lē'. ⁶⁴ Ní'irö bulu'sayjē' lahuē' Jesús, ate' gula'gápē'ē lahuē', en gula'nábinē' Lē', ta'nnē':

—iGunnéya'atsöca'! ¿Nuzxi na' gudapa' Li'?

⁶⁵ Ziánrö ca' gula'nnē' queē' le gulu'ē dö' queē'.

Ridxinē' Jesús lógaquiē' bönni' yudo' tu'chi'a tu'söróē'

(Mt. 26:59-66; Mr. 14:55-64; Jn. 18 :19-24)

⁶⁶ Cate' chizá' rení' dza na', bulu'dubē' bönni' gula tu'zéajni'inē' bönachi judío len yugu' bixúz unná bē', en bönni' yudo' tu'sédinē', ate' gula'ché'ē Jesús lógaquiē' bönni' yudo' tu'chi'a tu'söróē', ate' gula'nábinē' Lē', ⁶⁷ ta'nnē':

—Gudíxjöi'i netu'. ¿Naru' nactso' Li' Cristo?

Jesús rē' légaquiē':

—Channö guía' libí'ili' naca' Cristo, biti' tséajlē'ēli' neda', ⁶⁸ en channö inábida' libí'ili' tu didza', biti' ubí'ili' didza', en biti' usanli' neda'. ⁶⁹ Na'a isí lo, neda', Bönni' Guljē' Bönachi, cō'a cuita lē'ē ibēla Dios, nápatērē' yöl-la' unná bē'.

⁷⁰ Gula'nábinē' Lē' yúgu'tē', ta'nnē':

—¿Naru' nactso' Li' Zxí'inē' Dios?

Lē' gudxē' légaquiē':

—Le nácasö rnnali'.

⁷¹ Ní'irö ta'nnē':

—¿Núzxirö naquíniru' nu gun ba nalí queë'? La' ré'usö chibiyóniru' didza' ru'ë.

Ridxinë' Jesús lahuë' Pilato, bönni' rinná bë'ë uláz queë' César

(Mt. 27:1-2, 11-14; Mr. 15:1-5; Jn.18 :28-38)

23 ¹ Ní'irö gulazuínë' yúgu'të bönni' zían ni', ate' gula'ché'ë Jesús lahuë' Pilato, ² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzólitu' ca runë'. Runë' ga ta'dá'baga' bönachi uládz queë'tu' yúlahui', en ruzáguë'ë xinózigaca nupa ta'guíxxaj laz ruquíxxjë' César, en rnnë' lë cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzólida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunózinë' nababë' Jesús ga ni' rinná bë'ë Herodes, gusól-lë'ë Lë' lahuë' Herodes na', tu' zoë' ca' Herodes Jerusalén yugu' dza na'. ⁸ Cate' Herodes na' bilé'enë' Jesús, budzéjanë', tu' chiguca xidzé ré'ënë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'. ⁹ Ní'irö Herodes gunábinë' Jesús le zían, pero Jesús biti' bi didza' bubi'ë. ¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. ¹¹ Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. ¹² Dza na' bulu'dzáguië' dxi'a Pilato, en Herodes, tu' zí'alö gula'lé luzé'ë tuë' ia'tué'.

Ta'chúguië' queë' Jesús gátië'

(Mt. 27:15-26; Mr. 15:6-15; Jn.18 :39–19:16)

¹³ Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, ¹⁴ ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönnachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguili'-në' didza'.

¹⁵ Cate' gusól-la'a libí'ili' lahuë' Herodes, biti' bi budzólinë' le benë' bönni' ni le naca xíguia' nabáguë'ë para nu ichugu queë' gátië'. ¹⁶ Na'a usaca' zi'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönnachi tuë' bönni' nadzunë' cate' raca laní na', ca na' run cazë'. ¹⁸ Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

¹⁹ Nadzunë' Barrabás na' lidxi guíë tu' gudíl-lalenë' yúlahui' lu yödzö na', en tu' bëtië' bönnachi. ²⁰ Bulidzë' Pilato légaquië' leyúbölö, tu' ré'ënë' usanë' Jesús. ²¹ Leyúbölö gulu'ë zidzaj didza', ta'nnë':

—iBudë'ë lë'e yaga cruz! iBudë'ë lë'e yaga cruz!

²² Ní'irö Pilato gudxë' légaquië' le bunni luzuí, rnnë':

—¿Bizxi caz le ruá' dö' benë' bönni' ni? Biti' bi budzólida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

²³ Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bódxilë' yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'. ²⁴ Ní'irö Pilato guchúguië' queë' Jesús, para gaca queë' ca na' ta'nabë'. ²⁵ Busanë' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' bönnachi, bönni' na' chigula'nabë', ate' budödë' Jesús para gaca queë' ca na' të'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19 :17-27)

²⁶ Cate' ni' ta'ché'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzé'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzulë' Jesús.

²⁷ Bönnachi zián, enca' yugu' nigula söjñógaca Jesús, ta'bódxinu nigula na', en ta'bódxilë' yéchi'nu queë' Lë'. ²⁸ Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' códxili' quia' neda', pero guli'cödxilë' que quézili', en quégacabi' zxí'inili' ²⁹ tu' huadxín dza ila'nná: “Bica' bágaca yugu' nigula huödx, en nigula biti' guluá'anu-bi' bí'ido', en biti' bulu'gádxilë'nu-bi' bí'ido'.” ³⁰ Ní'irö ila'sí lógaca ila'nná bönnachi, ilé' yugu' guí'a sibi: “Guli'dubága' netu'”, en ilé' ca' yugu' guí'ado': “Guli'cachi' netu'.” ³¹ Channö caní tunë' quia' neda', naca' ca tu yaga ya'a, ¿naru' cabí ilúntërë' ca' queéli', nácali' ca yaga bidxi?

³² Gula'ché'ë ca' chopë' bönni' tuá' dö', para ilútië' légaquië' tsözxón len Jesús. ³³ Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dé'ë Jesús lë'e yaga cruz. Bulu'dé'ë

ca' lë'egaca yaga cruz chopë' bönni' tuá' dö'. Tuë' bulu'dé'ë cuita lë'ë ibëla Jesús, en ia'túë' bulu'dé'ë cuita lë'ë yögöla. ³⁴ Ní'irö Jesús rnnë':

—Xuz, buniti lo légaquië', tu' cabí nózguequinë' bi tunë'.

Bönni' rōjáquië' gudil-la nacu'ë ni' bulu'lë'ë que queégaquië' le nácuë' Jesús, en bulu'quitjë' le gaca bë' lahui. ³⁵ Bönachi nacuá' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' guró cazë' Dios.

³⁶ Yugu' bönni' na' rōjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi, ³⁷ ta'nnë':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: “Bönni' Rinná Bé'enë' Bönachi Judío.” ³⁹ Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

⁴⁰ Bubi'ë didza' ia'túë' bönni' huiá' dö' na', en gudil-lë' luzé'ë na', rnnë':

—¿Naru' cabí rádxinu'-në' Dios? Lësca' li' narugu quiu' gátui'. ⁴¹ Le nácatë rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

⁴² Ní'irö bönni' ni rë' Jesús:

—Yöjné neda' cate' idxinu' ga ni' inná bë'u.

⁴³ Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19 :28-30)

⁴⁴ Cate' bidxín idú huagubidza, guchul-la idútë yödzölió ga bidxinrö idú ridödi xihuó. ⁴⁵ Guchul-la gubidza, ate' lari' nal-la' lu yudo' biröza' chopa dí'ilö. ⁴⁶ Ní'irö bë'ë zidzaj didza' Jesús, rnnë':

—Xuz, rigula lu no'o bö' naca caza'.

Cate' budxi gunné' caní, birúajtë bö' naca cazë', gútië'.

⁴⁷ Cate' bönni' rinná bé'enë' bönni' rōjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

⁴⁸ Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuójgaquië' yödzö, ta'gapa' luchú'ugaquië' tu' tu'báninë'. ⁴⁹ Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yójacalennu Lë' cate' ni' gudé' luyú Galilea, ate' tu'yúë' lë ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn.19 :38-42)

⁵⁰ Zoë' ca' ni' tu bönni' yödzo Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söróë'. ⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios. ⁵² Ní'irö guyijë' José na' lahuë' Pilato, en gunabë' lataj u'ë Jesús. ⁵³ Cate' chinuzötjë' Lë', buchólinë' Lë' lari', ate' gulu'ë Jesús yeru ba, le nadaj lë'e guí'a guió'j, ate' lu ba na', cuntú nu nagüí'iguequinë'. ⁵⁴ Dza na' naca dza tu'pé'ë que dza lá'ayi quégaquië' bönni' judío, tu' si' idxín dza na'.

⁵⁵ Yöjácánu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. ⁵⁶ Cate' yöjhuó'jgácanu yu'u, bulu'pá'ánu nóri rilá' zxixi, en yugu' le za rilá' zxixi. Ní'irö bulu'zí' ládxi'gácanu dza lá'ayi na' quégaquië' bönni' judío ca na' rinná bë' xibá queë' Dios.

Rubanë' Jesús lu yöl-la' guti

(Mt. 28:1-10; Mr. 16:1-8; Jn.20 :1-10)

24 ¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gácanu yugu' le rilá' zxixi, lë na' chinupá'agácanu, ate' dzágagácanu légácanu ia'bál-lanu nigula. ² Cate' bila'dxinnu ni', bila'lé'enu chinadúa guió'j na' gudá' ga nu riyaza yeru ba queë'. ³ Cate' gula'yázanu yeru ba na', bití' bulu'dzólinu zoa Xanru' Jesús ni'. ⁴ Cate' ni' ta'bó'önu böniga ni'a que lë ni, chopë' bönni' nácugaquië' lari' rëpi yösa bení' la' bila'dxintë' ni', en gula'zuínë' ga na' nacuá'ánu. ⁵ Ní'irö guládxinu, en bulu'zötaj ícjagácanu, tu'yunu lu yu, ate' chopë' gubáz lá'ayi na' të' légácanu, ta'nné':

—¿Bizx que ruguílajli' nu zoa nabán xilataj nu nati? ⁶ Biti' zoë' ni, tu' chibubanë'. Guli'tsöjné lë na' chigudxi cazë' libí'ili' cate' ni' zoë' luyú Galilea. ⁷ Gunné': “Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dé'ë neda' lë'e yaga cruz, ate' ubana' cate' gaca tsonna dza.”

⁸ Ní'irö yöjnégácanu didza' na' bë'ë Jesús, ⁹ ate' bulu'zá'ánu ra' yeru ba na', yöjtíxjöi'iguequinu idxinéajtë' bönni' gubáz queë' Cristo, en ia'zíca'rë' ca', ca naca lë na' guca. ¹⁰ Nigula na' yöjtíxjöi'iguequinu bönni' gubáz na' yugu' lë ni, nácagácanu María Magdalena, en Juana, en María, xiné'ë Jacobo, en ia'bál-lanu nigula na' dzágagácanu légácanu. ¹¹ Guléquinë' bönni' gubáz na' tuí'ínu didza' chixi, en bití' gula'yéajlë'ë légácanu.

¹² Ní'irö gayasë' Pedro, en carelô sa'yéajë' ra' yeru ba na'. Cate' buyúë' lu ba na', bilé'enë' yugu' lári'sô nacuá' ni', ate' ní'irö böajë' lidxë', rubáninë' ca naca lë na' guca.

Le guca la' nöza ridxintë Emaús

(Mr. 16:12-13)

¹³ La' dza ná'asö sôjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. ¹⁴ Yú'ugacasë' ca' nöza, tu'ë didza' ca naca yúgu'të lë na' guca. ¹⁵ Tsanni ni' yú'ugaquië' nöza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxôn. ¹⁶ Biti' bulu'únbë'ë Lë' tu' naca ca tu le nabaga' guiôj lógaquië'. ¹⁷ Ní'irö Jesús gunábinë' légaquië', rnnë':

—¿Bizxi didza' na' ruí'ili' la' libí'isili' yú'uli' nöza? ¿Bizx que na' ruhuí'inili'?

¹⁸ Bubi'ë didza' bönni' na' lë' Cleofas, rë' Lë':

—¿Nácatso' bönni' zi'tu' lu yödzo Jerusalén, en tuzu' li' bití' nózinu' lë na' guca néaje nasi ni'?

¹⁹ Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxôn benë' dxin, en bë'ë didza' lahuë' Dios, en lógaca yúgu'të bönachi. ²⁰ Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátie', ate' bulu'dé'ë Lë' lë'e yaga cruz. ²¹ Netu' bentu' löza gúquië' Lë' bönni' na' ral-la' huöá'uë' bönachi Israel, pero na'a chiguca tsonna dza cate' gulaca lë ni. ²² Ia'stú, bál-lanu nigula nútsa'gacanu netu' gulunnu ga guró'ötu' böniga. Yöjácunu ra' yeru ba queë' cate' si' gulén gubidza na'a dza, ²³ en cate' bití' bulu'dzölinu Lë', buduhuôjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulé légacanu zoë' nabanë' Jesús. ²⁴ Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero bití' bila'lé'enë' Jesús.

²⁵ Ní'irö Jesús gudxë' légaquië':

—Libi'ili', bönni' bití' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios.

²⁶ ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtërë'?

²⁷ Ní'irö gusí lahuë' Jesús riguíxjöi'inë' légaquië' yúgu'të le ruí'i didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

²⁸ Cate' bila'dxinë' yódzödo' ga na' sōjáquië', benë' Jesús ca tu bönni' zéajtërë' zi'tu'. ²⁹ Gulunë' bayudxi ugá' analenë' légaquië', ta'nnë':

—Bugá' analen netu', tu' chiridzō' na'a, en chizóa gal-la.

Ní'irō guyázië' Jesús yu'u, en bugá' analenë' légaquië'. ³⁰ Cate' ni' Jesús rō'ë rágulenë' légaquië', gudélë'ë yōta xtila, en gudxë' Dios: "Xclenu'." Ní'irō buzuxzjë' le, en bē'ë quégaquië'. ³¹ La' ní'isō bidúa lë na' gubaga' guiōj lógaquië', ate' bulu'únbë'ë Jesús, ate' Lë' buniti cuinë' lógaquië'. ³² Ní'irō gulë' luzë'ë tuë' ia'túë':

—¿Naru' cabí böála'tica' lādxi'do'oru' tsanni ni' ruí'ilenë' rē'u didza' la' nōza, en cate' ni' ruchila lá'anië' le nazúaj lu guichi lá'ayi?

³³ La' ní'isō gula'zuínë' yōjhuōjgaquië' Jerusalén, ate' yōjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'. ³⁴ Ní'irō yugu' bönni' na' nacu'ë ni' gulë' chopë' na':

—Chibubán cazë' Xanru', en bulu'í'lahuë', ate' bilé'enë' Simón Lë'.

³⁵ Ní'irō chopë' na' gula'guíxjö'ë ca na' guca quégaquië' la' nōza, en ca na' bulu'únbë'ë Jesús cate' ni' buzuxzjë' yōta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn.20 :19-23)

³⁶ Tsanni ni' tu'ë didza' ca nácagaca lë ni, la' yōjsóatë' Jesús gatsaj láhui'lō ga na' nacu'ë, ate' rē' légaquië':

—Guli'sóa dxi lādxi'li'.

³⁷ Ní'irō guladxi gula'dzōbinë' tu' téquinë' bixín ta'lé'enë'. ³⁸ Jesús rē' légaquië':

—¿Bizx que rō'ōli' bōniga? ¿Bizx que rizá' lādxi'li' yugu' lë ni?

³⁹ Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ni' ruí'isë' ca' didza' ni, bulu'ínë' légaquië' në'ë, en ni'ë. ⁴¹ Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queéli' ni le gahua'?

⁴² Ní'irō bulu'nödzjë' queë' láti'do'oba' böla chinégui'ba', en tu quízxi'ba' buz. ⁴³ Guzxi'ë Jesús le, en gudahuë' lógaquië'. ⁴⁴ Ní'irō rē' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

⁴⁵ Ní'irō buzéajni'inë' légaquië' lë na' nazúajgaca lu guichi lá'ayi.

⁴⁶ Rē' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, ⁴⁷ ate' idútë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' ⁴⁸ ate' libí'i cázali' na' bilé'eli' yugu' lë ni ral-la' gunli' ba nalí que. ⁴⁹ Buli'yútsöca', isól-la'a queéli' le guzxí' lu në'ë Xuza' gunnë' queéli', pero buli'gá'anasö Jerusalén cate' idxinrö queéli' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

⁵⁰ Ní'irö Jesús guché'ë yugu' bönni' dá'gaquië' Lë', söljáquië' yödzö Betania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. ⁵² Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuójgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!